

Xojon-la San Juan kjoa xi tsakó-la Jesucristo

Kjoa xi kijtseè kò 'én xi kii'nchré San Juan

1 ¹Jñà kjoa koi xi kitjoé-la Jesucristo nga Nainá kitsjaà-la mé-ne nga kokò-la xita chi'nda-la jñà kjoa xi ta nitoón okoma. Jesucristo kisikasén àkjale-la nga tsakó-la kjoa koi Juan xi chi'nda-la ma. ²Kò jè Juan tíchja kixi-né [k'e nga kiskiì] ngats'iì kjoa xi kijtseè kò xi kii'nchré koni s'ín nga jè Jesucristo kiìchja kixi-la jñà 'én xi kitsjaà-la Nainá.

³Mé tà ndaà-la jè xita xi bíxkejiìn xojon koa jñà xi 'nchré 'én-la Nainá xi tít'aà xojon jè, jñà kjoa xi sa kítasòn; tikoáá mé ta ndaà-la jè xita xi síkitasòn koni tsò xojon jè, nga jè nàchrjein, jyeé nchrobá machrañà.

Kó tsò Juan nga síhixat'aà nga itoò naxandá-la Cristo xi títsajna ján i'nde Asia

⁴Añ xi 'mì-na Juan, tisihiixat'aà-nò, jñò xi naxandá-la Cristo maà xi itoò i'nde titsajnaà ján nangui Asia. Jè kàtatsjá-nò kjondaà kò kjoa'nchán jè Nainá xi tíjna, jè xi tsibìjna kò jè xi kjoíí ìjngod k'a-ne; k'oa tìs'ín kàtatsjá-nò kjondaà kò kjoa'nchán jñà inima xi itoò ma-ne xi títsajna nguixkòn jè xi tíjnasòn íxile nga tíhotíxoma; ⁵kò jè Jesucristo k'oa tìs'ín kàtatsjá-nò kjondaà kò kjoa'nchán. Jè Cristo, jè xi nguì 'én kixi tsjá, xi ki'ndí tjòn xi jaáya-la it'aà ts'e kjoa biyaà kò jè xi otíxoma-la jñà xita sko-la xi tjín i it'aà nangui. Cristo matsjakeè-ná nga kisítsjeé jé-ná it'aà ts'e jní-la xi tsibíxteèn. ⁶Cristo k'oaá s'ín kisikítsajna-ná nga xita ítjòn komaá kò no'miù komaá nga jñà sixá-lá Nainá xi Nà'èn-la ma Jesucristo. Jeya kàtìjna;

jè kàtatíxoma kjit'aà, nīta mé nachrjein-ne, nīta mé nó-ne. K'oas'ín kàtama.

⁷Chítsejèn-là! Jè Cristo jyeé kjomeé f'iì nga tínchrobájiìn ifi. Ngats'iì xīta, xkoón skoe-ne. Jñà xīta xi kisik'en Cristo tīkoáá skoe-ne. Ngats'iì xīta naxandá xi tjin i it'aà nangui skindáyakeè-né nga 'on koma-la it'aà ts'e. Jon, k'oaá s'ín koma.

⁸"'An-ná xi tījna ítjoàn skanda tàts'en-la kjoa ko nga skanda fehet'aà-ne; 'an-ná xi tījnaa, xi tsibijnaa, ko xi kjoii ijngod k'a; tajngoo-ná xi tse nga'nó tjin-na", tsò Nà'èn-ná xi Nainá.

Kjoa xi tsakó-la Nainá Juan it'aà ts'e Cristo

⁹'An-ná xi mì-na Juan, xi 'ndsè xan-nò it'aà ts'e Cristo. Nga yaá tītsajnakoaá Cristo ngàsòn tītsanìkjaán kjo'in, ko ngàsòn ya nokjoà-ná ñánda tíhotíxoma Nainá ko ngàsòn tíhíkjoako-ná ngats'iì kjoa. 'An nga 'én-la Nainá tíhjàya ko tibenojmí kixi-la xīta it'aà ts'e Cristo, k'oaá komà-ne ján kinikasén-na ya nangui jiìn-ndá ñánda 'mì Patmos. ¹⁰Jngod nachrjein-la Nainá, 'an, nga ya tījnakoaa Inīma Tsjeè-la, ya ijton índsiàn ki'nchrè jngod-la 'én xi 'ñó kiìchja koni jngod chrjo xi 'ñó jane, ¹¹kitsò-na:

—'An-ná xi tījna ítjoàn ko xi fehet'aà-ne. Chjoí jngod xojon, tít'eii kjoa xi tì'yi; ikjoàn tīkasén-la naxandá-na xi itod i'nde tītsajna ján nangui Asia, jñà naxandá xi 'mì Éfeso, Esmirna, Pérgamo, Tiatira, Sardis, Filadelfia ko Laodicea.

¹²K'eé kisikátjifaya nga mejèn-na skoeè yá xīta xi tíhja-na; kījtseè itod candelero xi ngui kīcha oro xi ma tiya asiti. ¹³Ya jngod osen-la ñánda jncha candelero xi itod ma-ne síjnajiìn xi okji koni kji ki'ndí-la xīta. Jngod níkje kinakjá xi ndojò kji. Bijchó skanda ítjòn ndsoko. Tíkjá jngod na'ñó payo ya isòn inīma-la xi ngui oro. ¹⁴Tsja sko, k'oaá kjoàn koni kjoàn tsja chroba-la orrè, koni kjoàn 'nchán kjoàn. Xkon, k'oaá s'ín tsejèn koni tsà títi ni'ín. ¹⁵Ndsoko k'oaá kjoàn koni kīcha sinè xi 'ñó ndaà ote k'e nga jye síjiìn ni'ín. Jè jta-la, k'oaá s'ín na'yà-la koni ñánda 'ñó je nandá tíbixòjen-tjòn. ¹⁶Jè tsja kixi, itod ni'ño tjíya. Jè tso'ba jngod kīcha ndojò bitjo xi 'ñó yijò kji ingajò ngobà. Isén-la k'oaá kji koni kji ts'oi k'e nga 'ñó matsjè ndobá, 'ñó ote kji.

¹⁷K'e nga kijtseè, kiskaànguia ingui ndsokò koni jngodò mik'en. Ikjoàn jè tsakájnason-na tsja kixi, kitsò-na:

—Ki tsakjoòn-jèn, 'an-ná xi tijná ítjoàn kò xi fehet'aà-ne, ¹⁸kò tijnakon-ná. Tsakátijna k'en-ná tanga i'ndeí tijnakon-ná nita mé nachrjein, nita mé nó-ne. 'An tjiya ndsaa ibi ts'e kjoabiyàà ya i'nde-la mik'en. [Tji'ndeé-na nga skix'aa kò kichjoà nga siikjaáya-la.] ¹⁹Chjí jñà kjoa xi jye kà'yi kò kjoa xi tíma nachrjein i'ndeí kò kjoa xi koma nga koma iskan. ²⁰Kíí tsò-ne jè kjoa'ma xi kà'yi ts'e ni'ño xi itodò ma-ne xi tjiya ndsaa kixi kò xi itodò candelero xi nguì kichà oro. Jñà ni'ño xi itodò ma, jñà àkjale-la naxandá-na xi itodò i'nde títsajna; kò jñà candelero xi itodò ma-ne, jñà-né xi naxandá-na xi itodò i'nde títsajna.

Kjoa xi kisinè-la naxandá-la Cristo ján Éfeso

2 ¹Chjí jngodò-la xojon jè àkjale-la naxandá-na xi tijná ján Éfeso: “Kíí tsò jè xi itodò ni'ño tjiya tsja kixi, jè xi tsóhojiin osen-la jñà candelero xi itodò ma-ne xi nguì kichà oro, tsò-né: ²Tìbe-ná xá-nò, 'nó titsanixá kò nga mìkii bijta-nò. Tìkoáá tìbe-ná nga mì tì kiì chíkjoakò-nò jñà xitá xi ch'o s'ín. Tìkoáá tìbe-ná nga jyeé kichit'aà jñà xitá xi tsò-la yijo-la nga Cristo tsibixáya-la, tanga mitsà kixi kjoa. Jyeé ki'yaà nga xitá ndiso-né. ³Kjit'aà nachrjein 'nó tse kjo'in titsanikjioón, kò 'nó titsanixá xi kjoa ts'an. Mikii bijta-nò. ⁴Tanga tjin jngodò-nò kjoa xi ch'o tjin xi mìkii sasén-na nga mì tì k'oaá s'ín tjin-nò kjotjòcha koni nga sa ítjòn. ⁵Jñò, tikítsjeèn kó ki'nè nga sa ítjòn k'e nga kj'eè jè bixòjñod. Tìkájno jé-nò. Ijngodò k'a Nainá tanguít'aà-là. K'oaá s'ín t'een koni ki'nè nga sa ítjòn. Tsà majìn-nò, 'an kjián nga tsjaà-nò kjo'in kò kjoaáxin-nò ni'ín candelero-nò ya i'nde nánnda síjna. ⁶Tanga tjin kjoa xi ndaà tita'nè nga majticha kjoa xi s'ín jñà xitá nicolaítas. 'An, tìkoáá majtike-ná. ⁷Ndaà tiná'yaà koni tsò Iníma Tsjeè-la Nainá nga tíchja-la naxandá-na. Jñà xi siikijne, 'aán tsjaà-la nga skine jñà toò-la jè yá xi síkijnakon-ná xi síjna ya i'nde-la Nainá nánnda 'nó ndaà choòn.”

Kjoa xi kisinè-la naxandá-la Cristo ján Esmirna

⁸Chjí jngodò-la xojon jè àkjale-la naxandá-na xi tijná ján Esmirna: “Kíí tsò jè xi tsibijna ítjòn kò xi fehet'aà-ne, jè

xi k'en k_o jaáya-la, tsò-né: ⁹Añ be-ná xá-nò k_o kjo'in xi títanikjioón k_o nga xitá ima 'mì-nò (tanga it'aà ts'e Nainá, xitá nchiná-nó jñò). Be-ná nga ch'oó chjajno-nò jñà xitá xi tsò nga xitá judío-né tanga mìtsà kixi kjoa nga xitá judío. Jñà xitá koi, yaá chja-ne ya ni'ya ñánda maxkóya xitá-la xitá neíí. ¹⁰Kì tsakjoòn-jèn jè kjo'in xi sikjioón, jè xitá neíí skinìs'en-nò ndayá mé-ne nga skót'aà-nò kjoa xi mokjeíin-nò; te nachrjein s'e-nò kjo'in. 'Nó t'è-là takòn kóni skanda k'e nga kiyá. K_o 'aán tsjaà-nò jè kjoabinachon xi mìkiì fehet'aà koni jngoò corona. ¹¹Ndaà tiná'yaà koni tsò Inima Tsjeè-la Nainá nga tíchja-la naxandá-na. Jñà xi sìkijne, nímé kjoa xi komat'in it'aà ts'e kjoabiyaà xi ma-ne jò k'a.”

Kjoa xi kisinè-la naxandá-la Cristo ján Pérgamo

¹²'Chjí jngoò-la xojon jè àkjale-la naxandá-na xi tíjna ján Pérgamo: “Kíí tsò jè xi tjin-la kichá ndojò xi yijò kji nga ingajò ngobà, tsò-né: ¹³Añ tibe-ná xá-nò, tibe-ná nga yaá títajnaà ñánda tíhotíxoma xitá neíí. Tanga be-ná nga kixi títajnaà; mìkiì nìjchàajioòn it'aà ts'an. Tikoá be-ná nga mìkiì bì'ma koni s'ín mokjeíin-nò it'aà ts'an, nas'ín k'e nga k'en Antipas, xitá xi kixi bénojmi xi it'aà ts'an; nga yaá k'en jjiin naxandá-nò ya ñánda síxá xitá neíí. ¹⁴Tanga tjin i'nga kjoa xi mìkiì sasén-na nga ch'o tita'nè, nga yaá títajnajiiin-nò xitá xi mokjeíin-la koni s'ín tsakóya Balaam kjòtseé nga chinchá'a Balac nga mejèn-la kohótsji jé jñà xitá Israel nga kàtakine tsojmì xi xkósòn kisinchaat'aà-la; tikoá kàtas'ín kjoachijngui. ¹⁵Tikoáá títajnajiiin i'nga-nò xitá xi mokjeíin-la koni s'ín okóya jñá xitá nicolaítas. Jñà xitá koi, 'an majtike-ná. ¹⁶K'oaá ma-ne tikájno jé-nò, kì tì jé binchaatsji-nò. Tsà mì k'oa s'een, nitoón kjián nga skaàn-koa xitá koi. Jè sikjeén kichá ndojò xi bitjo-ne ndsobá. ¹⁷Ndaà tiná'yaà koni tsò Inima Tsjeè-la Nainá nga tíchja-la naxandá-na. Jñà xi sìkijne, 'aán tsjaà-la tsojmì xi skijne xi 'mì maná xi 'an tji'ma-na; tikoá tsjaà jngoò-la ndí ndajo jjobá xi chroba kji; yaá tjit'aà 'ín xitse xi mì yá beèxkon; tà jè skoexkon xi tjoé-la.”

Kjoa xi kisinè-la naxandá-la Cristo ján Tiatira

¹⁸'Chjí jngoò-la xojon jè àkjale-la naxandá-na xi tíjna ján Tiatira: “Kíí tsò jè Kì'ndí-la Nainá xi kòkjoàn xkon koni ni'ín,

ko jñà ndsoko, k'oaá kjoàn koni kicha sinè xi 'mì bronze xi 'ñó ndaà kjòchrja'i: ¹⁹ 'An, be-ná xá-nò ko kjoatjòcha-nò, ko kós'ín nga mokjeiín-nò koá kós'ín titsanixá nga tíchíkjoako-nò xá xi títsa'nè. Be-ná nga jè nachrjein i'ndeí isaá ndaà titsanixá mì k'oa-ne koni nga sa ítjòn. ²⁰ Tanga tjín i'nga kjoa xi mìkiì sasén-na nga ch'o títsa'nè, nga bìi'nde-là jè chjoón Jezabel xi tsò-la yijo-la nga ma-la bénojmiya mé kjoa xi iskan koma nga konachan ko okóya-la xita chí'nda-na mé-ne nga kjoachijngui kátas'ín-ne tikoá kátakine tsojmì xi xkòsòn sinchát'aà-la.

²¹ 'Aán títsja isa-la nachrjein nga kátasíkájno jé-la nga mì tì jé kohótsji-ne, tanga majìn-la tsjeiìn takòn kjoachijngui xi s'ín.

²² Tanga 'aán tsja-la ch'in nga 'ñó tse kjo'in siikjeiín ko jñà xita xi ngásòn s'ín kjoachijngui, tsà majìn-la nga siikájno jé-la nga mì tì jé kohótsji-ne. ²³ Jñà xita xi ya fit'aà-la, jngod k'aá s'ik'en. Ko ngats'iì xita naxandá-la Cristo skoe-né nga 'an-ná xi be kó tsò kjohítsjeèn-la ko inima-la jñà xita. Jñò, nga jngod ìjngod,

k'oaá s'ín tsja-nò kjo'in koni tjín kjoa xi títsa'nè. ²⁴ Tanga jñò ko xita xi i'nga xi títsajna Tiatira xi mìkiì kota'ya kjohítsjeèn xi mìkiì ndaà tjín, tikoá kj'eè kiì beè jè xi tsò-la jñà xita koi kjoatjí'ma-la xita neií. Jñò, k'oaá xan-nò mìtsà tì mé kjoa siijé-isa-nò. ²⁵ Tanga jñò, koni s'ín tjín jè kjohítsjeèn ndaà xi títsa'nè, k'oaá s'ín t'een skanda k'e nga 'an kjoiaa ìjngod k'a.

²⁶ Jñà xi siikijne-la kjoa ts'e jé tikoá siikitasòn xá-na koni s'ín mejèn-na skanda k'e nga kjoehet'aà nachrjein, 'aán tsja-la xá nga jñà kotixoma-la ngats'iì naxandá xi tjín isò'nde. ²⁷ Jñà xita xi kotixoma, ngui koó kicha kotixoma-ne. K'oaá s'ín siixkoaya koni tijí ni'nde. ²⁸ Jè kjotixoma jè, tijé-ne xi kitsjaà-na Na'èn-na. 'An tikoá tsja-la jè ni'ño tse xi bitjokàtji k'e nga tajñòya. ²⁹ Ndaà tin'áyaà koni tsò Inima Tsjeè-la Nainá nga tíchja-la naxandá-na.”

Kjoa xi kisinè-la naxandá-la Cristo ján Sardis

3 ¹ Chjí jngod-la xojon jè àkjale-la naxandá-na xi tíjna ján Sardis: “Kíí tsò jè xi itò inima-la Nainá tjín-la, ko itò ma ni'ño-la: 'An be-ná kjoa xi títsa'nè; k'oaá s'ín 'ya-nò nga titsajnakon-nó tanga xi ngui kixi kjoa, titsajnak'en-nó.

² Tikjaáya-là yijo-nò, tjiì-là nga'ño kjoa xi jye mejèn tíchija. 'An, kj'eè kiì be tsà ndaà títsa'nè nga nguixkon Nainá.

³ Tikítsjeèn kjohítsjeèn xi kitjoé-nò ko xi jye ndaà kina'ya;

k'oas'ín t̄ikitasòn. T̄ikájno jé-nò, k̄ì t̄ì jé binchaàtsji-nò. Tsà mìkii s̄ikindaa yijo-nò k'oaa s'ín k̄joiikjaá-nò koni s'ín x̄ita chijé k'e nga mìkii t̄itsajnandaà mé hora-ne nga k̄joií. ⁴Tanga t̄jín chiba-nò x̄ita ya Sardis xi k̄j'eè mé jé ótsji, yaá taña k̄inchimakò-na nga chroba k̄joàn nikje xi kókjá nga k'oaa s'ín ok'ín-la. ⁵Jñà x̄ita xi s̄ìkijne-la k̄joa ts'e jé, nikje chrobaá k̄joàn xi kókjá; mìkii s̄ijchàaya 'ín-la ya it'aà xojon ts'e k̄joabinachon. Kò k'oaa xán nga nguixkòn Nainá xi Na'èn-na ma kò nguixkòn àkjale-la nga x̄ita ts'an-ná. ⁶Ndaà tiná'yaá koni tsò Inima Tsjeè-la Nainá nga t̄ichja-la naxandá-na.”

Kjoa xi kisinè-la naxandá-la Cristo ján Filadelfia

⁷Chj̄i jngodè-la xojon jè àkjale-la naxandá-na xi t̄jna ján Filadelfia: “K'oaa tsò jè xi nguì x̄ita tsjeè kò xi nguì jè sobà xi x̄ita kixi, jè xi t̄jín-la ibi-la x̄itaxá ít̄jòn xi ki'mì David, jè xi ma-la k̄ix'a xòhotjoa-la ngajmii kò nijngodè-isa xi t̄j'nde-la nga k̄ichjoajto; kò k'e nga jè k̄ichjoajto, nijngodè-isa xi t̄j'nde-la nga skíx'ajto: ⁸'An be yije-ná xá-nò; chítsejèn-là, kisikijna osen jngodè-nò xotjoa xi tix'á, xi nijngodè t̄j'nde-la nga k̄ichjoajto. Nga nas'ín tà chiba nga'nño t̄jín-nò tanga t̄itsan̄ikitasòn-nó koni tsò 'én-na; mìkii bitsajna'ma it'aà ts'an. ⁹T̄jín jngodè j̄tín x̄ita xi ya chja-ne ya ni'ya n̄anda maxkóya x̄ita-la x̄ita neí; x̄ita ndiso-né nga tsò nga x̄ita judío, tanga m̄itsà kixi kjoa. X̄ita koi, 'aán kichjà-la nga k̄atjanchrobá mé-ne nga k̄incha-xkó'nchit'aà-nò; k'oaa s'ín skoe-ne nga 'an, 'ñó matsjake-nò. ¹⁰Koií kjoa-la nga t̄itsan̄ikitasòn koni tsò 'én xi kitsjaà-nò nga k̄ichikjoakò k̄jit'aà-nò n̄ita mé kjoa-ne, k'oaa ma-ne, 'aán kósiko-nò jè nachrjein xi jye nchrobá machrañà nga s'e-la k̄jo'in nga t̄jtsa isò'nde k'e nga chít'aà yije x̄ita xi i t̄itsajna it'aà nangui. ¹¹Kjoií n̄itoón ìjngodè k'a. Ndaà t̄ikindaa ngats'iì kjondaà xi t̄jín-nò koni s'ín mokjeiín-nò mé-ne nga mì yá xi kjoaa'an-nò xi jñò jye kin̄ikijne. ¹²Jñà xi s̄ìkijne-la ngats'iì kjoa ch'o xi t̄jín isò'nde, 'aán tsja jngodè-la ì'nde n̄anda k̄itsajna nga k̄jit'aà nachrjein k'oaa ngaya-la koni jngodè chrjò xi k̄osingui'nó-la ya ni'ya tsjeè-la Nainá nga skiijnoa 'ín-la xi Nainá xan-la kò 'ín-la naxandá-la Nainá, xi Jerusalén x̄itse 'mì xi k̄jinchrobà-ne ngajmii n̄anda t̄jna Nainá, t̄ikoā skiijnoa 'ín x̄itse xi ts'an. ¹³Ndaà tiná'yaá koni tsò Inima Tsjeè-la Nainá nga t̄ichja-la naxandá-na.”

Kjoa xi kisinè-la naxandá-la Cristo ján Laodicea

¹⁴Chjí jngodè-la xojon jè àkjale-la naxandá-na xi títina ján Laodicea: “Kíí tsò jè xi síjngodè yije 'én-la Nainá, jè xi nguì 'én kixi tsjá, jè xi nguì jè sobà kjoakixi, jè xi tsibíts'ia ngats'iì xi tsibíndaà Nainá. K'oaá tsò: ¹⁵'An, be-ná mé kjoa xi títsa'nè; mìtsà 'nchán títsajnaà nì mìtsà tsjè títsajnaà nga mìtsà kondra títsajna-kò-ná kò mìtsà ndaà onguít'aà-ná. Ndaà-là títin tsà nguì ndaà onguít'aà-ná kò tsà majìn tsà nguì kondra títsajna-kò-ná. ¹⁶Tanga jñò, nga isò-nò, mìtsà 'nchán títsajnaà nì mìtsà tsjè títsajnaà, k'oaá ma-ne nga ndsobà skìhisò-na. ¹⁷Jñò k'oaá bixón: Xità nchiná-nájen; ndaà títsajna-jen; nímé chijat'aà-najen. Tanga mìkiì 'ya nga 'iín títsajnaà; nímé xi títin-nò; xità imá-nó; mìkiì tsejèn-nò; laká títsjodè. ¹⁸'An, k'oaá xan-nò, 'aán tìndát'aà-ná ton oro xi ni'ín kjòtsjeè-ne mé-ne nga xità nchiná koma-nò. Tíkò 'aán tìndát'aà-ná nikje tsjeè xi chroba kjoàn mé-ne nga mì kosobà-nò nga títsajna laká yijo-nò. Tíkò tinguioè xkiì colirio jñà xkoòn mé-ne nga ndaà kotsejèn-nò. ¹⁹Ngats'iì xità xi 'an matsjake, otìko-ná tíkò tsjaà-la kjo'in. Mochjeén-né nga tjiì-là nga'nó yijo-nò; tìkájno jé-nò, kì tì jé binchaàtsji-nò. ²⁰'An, yaá tijnajtoa xotjoa ni'ya nga tìchjà; tsà títin i'nga xi kji'nchré-na, koa tsà skíx'a xotjoa ni'ya-la, komaá kjoahas'en nga kókjen-koa, tíkò jè, kòkjen-ko-na. ²¹Jñà xi sìikijne tsjaà'nde-la nga ya kítsajnat'aà-na nándà títina íxile ts'e kjotíxoma-na koni s'ín 'an jye kisikijne nga yaá tijnat'aà-la Na'èn-na nándà títina íxile ts'e kjotíxoma-la. ²²Ndaà tìná'yaá koni tsò Inimá Tsjeè-la Nainá nga tìchjà-la naxandá-na.”

Kós'ín yaxkón Nainá ján ngajmii

4 ¹Xi jye komà iskan, kiskodtsejèn ján i'ngaá; kijtseè ngajmii nga tix'á jngodè xotjoa kò jè jta xi ki'nchrè ítjòn-la xi koa tsò koni chrjo trompeta, kitsò-na:

—Nchrobá mijìn ijndé; kokoò-lè kjoa xi koma k'e nga jye komà yije kjoa xi tíma i'ndeì.

²Tà nitoón j'iì kanè ijngodè k'a-na jè nga'nó-la Inimá Tsjeè-la Nainá; kijtseè jngoàà íxile xi títina ngajmii nándà tísatíxoma. Jé íxile jè, títina jngodè xi ya tijnasòn. ³Jè xi tijnasòn íxile nga tíhotíxoma, k'oaá kji ote tsejèn koni kji ndajo chjí xi 'mì

jaspe, o koni kji ndajo chjí xi 'mì cornalina. Ya indii-la íxile síjñandii jngod-la ijñe xi okji ote tsejèn koni kji ndajo chjí xi 'mì esmeralda. ⁴Tiyaá-ne nga jngod itjandii-la ñánda títina xi títinasòn íxile nga tíhotíxoma, kaàn ñijòn íxile 'ncha isa ñánda tísatíxoma, tíkoa kaàn ñijòn xita jhínga títsajnasòn xi nguì chroba kjoàn nikje xi kikjá; saà corona kicha oro tji'a sko. ⁵Ya ñánda títina xi títinasòn íxile nga tíhotíxoma, bitjo ni'ín ch'on, ko ts'iin ch'on, tíkoa na'yà-la jta xi chja; itod ni'ín xi síhiseèn títi ya nguixkon íxile; jña ni'ín, jña inima tsjeè-la Nainá xi itod ma-ne. ⁶Ya nguixkon jè xi títinasòn íxile nga tíhotíxoma, kjiina jngod ndáchikon xi koni kji chitsín kji xi 'ño ote.

Ya it'aà íxile ko ya indii-la, ñijòn ma xi títsajnakon; kóhokji ijton íts'in ko ya indso'ba, xki xi ján tjt'aà xkon. ⁷Jè xi títina íjòn jña xi títsajnakon, k'oaá kji koni kjoàn xa. Xi ma-ne jò, koni kji nchraja ki'ndí kji. Xi ma-ne jàn, isén-la xitaá tjin-la. Xi ma-ne ñijòn, k'oaá kji koni kji ja xi tsó'bajiiin isén. ⁸Jña xi ñijòn ma-ne xi títsajnakon nga jngod ijngod, jodn jngaá tjin-la. 'Nó kjín ma-ne xkon xi tjin nga jngod itjandii-la ko iya-la. Mikii síkjáya ko nchrjein ko nitjen nga tsò:

Tsjeè-né, tsjeè-né, tsjeè-né jè Na'èn-ná xi Nainá,
xi ta jè tajngoó xi 'ño tse nga'ño tjin-la,
jè xi tsibijna, jè xi títina ko jè xi kjoíi ijngod k'a-ne.

⁹Jña xi títsajnakon nchitsjá-la kjoajeya, nchitsjá-la kjondaà, ko nchibeèxkón jè xi títinasòn íxile jè xi títinakon nita kjé-ne. K'e k'oa nchis'ín, ¹⁰jña xita jhínga xi kaàn ñijòn ma-ne bincha-xkó'nchi-ñiat'aà-la jè xi títinasòn íxile tíkoa beèxkón-né jè xi títinakon nita mé nchrjein-ne. Síkatsjod corona-la ya nguixkon jè xi títinasòn íxile nga tsò:

¹¹Na'èn, ok'ín-lè nga ji tjoé-lè kjoajeya, nga jchaxkón-lè,
nga tsiji yije-né nga'ño xi tjin,
nga ji tsibindii ngats'iì tsojmì xi tjin,
nga k'oaá s'ín kjòmejèn-lè nga tjin yije tsojmì
ko nga kisindaà kóhotjín xi tjin.

Xojon xi maxkóya ko jè Orrè

5 ¹An, kijtsee jè xi títinasòn íxile nga tíhotíxoma, kjinaya tsja kixi jngod xojon xi kjixkóya xi kitjeijno iya-la ko ngatsejèn-la ko itod k'a tji'ño ñánda jncha-la sello nga jngod

ijngoò k'a. ²Kijtseè jngoàà àkjale xi tse nga'nño tjín-la, xi 'nño kiichja nga kitsò:

—Yá xi ok'in-la nga skíx'a jè xojoñ koa komà-la kjoaáxin jñà sello xi jncha-la.

³Tanga niyá kisakò xi komà-la nga kiskíx'a jè xojoñ, ni mìkii ma kotsejèn-la nga kot'aà kó tsò 'én xi tjít'aà; nijngoò kisakò ján ngajmii, nijngoò kisakò it'aà nangui, koa nijngoò kisakò ingui nangui. ⁴'An, 'nño kiskindàya nga ko ndáxkoaàn k'e nga kijtseè nga nijngoò kjòtsji xi ok'in-la nga kiskíx'a jè xojoñ nga ma kot'aà kó tsò 'én xi tjít'aà. ⁵Jñà xita jchínga xi kaàn ñijòn ma-ne, jngoò xi kitsò-na:

—Ki chihindàya-jèn. Tíjna xi 'mì: Xa-la xita naxandá Judá, xi tikoá 'mì: Tje-la xitaxá ítjòn David, nga jè xi jye kisikijne-la kondra-la. Jè xi ok'in-la nga skíjndaya jè xojoñ koa koma kjoaáxin sello-la xi itòò ma-ne.

⁶K'eé kijtseè jngoò Orrè nga síjna ya jngoò osen-la ñánda tíjna xi tíjnasòn íxile nga tíhotíxoma, ko ñánda títsajna jñà xi ñijòn ma-ne xi títsajnakon, ko ñánda títsajna xita jchínga xi kaàn ñijòn ma-ne. Jè Orrè, k'oaá kji koni tsà jye k'en; itòò ma nchrajá-la tikoa itòò ma xkon; jñà xkon, jñà inima-la Nainá xi itòò ma-ne xi kinikasén nga tíjtsa isò'nde. ⁷Jè Orrè, kiskoé jè xojoñ xi kjinaya tsja kixi jè xi tíjnasòn íxile nga tíhotíxoma.

⁸Jè Orrè, k'e nga jye kiskoé xojoñ jè, jñà xi ñijòn ma-ne xi títsajnakon ko jñà xita jchínga xi kaàn ñijòn ma-ne chinchaxkó'nchi-ñiat'aà-la nga nguixkon Orrè. Ngats'iì saà ní'nño arpaá 'ya ko chitsín xi nguì oro xi tjíya chrjongó-la nainá. Jè chrjongó-la nainá jñà xi kjoa bítsi'ba-la jñà xita-la Nainá.

⁹Kiseè jngoò sò xitse xi tsò:

Ok'in-lè nga ngaji chjoí jè xojoñ, chjaàxin sello-la nga ji kinik'en-lè, nga ko jní-lè tsibíchítjì xita xi ya itjokàjiìn-ne ngats'iì tje-la xita xi tjín isò'nde, ngats'iì 'én xi tjín isò'nde, ngats'iì naxandá xi tjín, ko ngats'iì nangui xi tjín isò'nde mé-ne nga ya kichja-ne it'aà ts'e Nainá.

¹⁰Ko xitaxá ítjòn ki'nì ko no'mii ki'nì nga ma sikitason-la Nainá, koa jñà kotìxoma i it'aà nangui.

¹¹ K'e nga kiskoòtsejèn, ki'nchrè jta-la jña àkjale xi kjiìn jchán millón ma-ne xi nchiseè ya indi-la ñánda tìjna xi tìjnasòn ixile nga tíhotíxoma kò ya ñánda tìtsajna jña xi tìtsajnakon kò jña xita jchínga. ¹² Ñó jchán nchichja nga tsò:

Jè Orrè xi kinik'en, ok'ín-la nga jchaxkón
nga ts'e yije-né nga'ño xi tjin,
kò kjoa nchiná kò kjoa chjine,
kò jè tsjá nga'ño,
ndaà kàtayaxkón,
jeya kàtìjna kò 'nga kàtìjna.

¹³ Ngats'ii xi xó kisindaà-ne xi tjin ngajmiì, xi tjin i it'aà nangui kò ya ingui nangui, kò xi tjin jjiìn ndáchikon, ki'nchrè-la nga tsò:

Jè xi tìjnasòn ixile kò Orrè, 'nga kàtìtsajna;
kàtayaxkón, jeya kàtìtsajna,
kàtas'e-la nga'ño nita mé nachrjein-ne.

¹⁴ Jña xi ñijòn ma-ne xi tìtsajnakon, kitsò:
—jK'oas'ín kàtama!

Jña xita jchínga xi kaàn ñijòn ma-ne chincha-xkó'nchi-ñiat'aà-la nga jeya kisikijna jè xi tìjnakon nita mé nachrjein-ne.

Sello xi itoò ma-ne

6 ¹ K'ée kijtsee jè Orrè nga jaàxìn ítjòn jngoò sello. Ikjoàn ki'nchrè jngoò-la jña xi ñijòn ma-ne xi tìtsajnakon nga kiichja. K'oaá kitsò koni ma ch'on nga one, kitsò:
—Nchroboí.

² Kiskoòtsejèn, k'ée kijtsee jngoò kohòyo xi chroba kji; jè xi tìjnakjá-la kohòyo, kjinaya tsja jngoò arco xi mochjeén k'e nga tjin kjojchán; ikjoàn kitjoé jngoò-la corona xi si'a skò xita k'e nga síkijne; kii nga jye kisikijne mé-ne nga sùkijne isa-ne.

³ Jè Orrè, k'e nga jaàxìn sello xi ma-ne jò, ki'nchrè-la jè xi ma-ne jò xi tìtsajnakon nga kitsò:
—jNchroboí!

⁴ Kò ìjngoò kohòyo itjo xi inì kji; jè xi tìjnakjá-la, kitjoé jngoò-la kichà ndojò xi 'ño je kji, tikoá kitjoé-la nga'ño nga kàtjaàxìn kjoa'nchán xi tjin it'aà nangui mé-ne nga kàtasík'en-ne xíkjin jña xita.

⁵Jè Orrè, k'e nga jaàxìn sello xi ma-ne jàn, ki'nchrè-là jè xi ma-ne jàn xi títajnakon nga kitsò:

—¡Nchroboí!

K'e nga kiskoòtsejèn, kijtseè ìjngoò kohòyo xi jmà kji; jè xi tijnakjá-là kohòyo, jngoò libra tjiya tsja jè xi machibaya-ne tsojmì. ⁶Ki'nchrè jngoò-là jta ya jngoò osen-là jñà xi ñijòn ma-ne xi títajnakon nga kitsò:

—Nga jngoò nisoò trigo, jngoò nachrjein chjí-là chi'nda tjin-ne. Kò nga jàn nisoò cebada, tikoáá jngoò nachrjein chjí-là chi'nda tjin-ne. Kì tà nìkìts'ón-jen jè asitì kò vino.

⁷Jè Orrè, k'e nga jaàxìn sello xi ma-ne ñijòn, ki'nchrè jta-là jè xi ma-ne ñijòn xi títajnakon nga kitsò:

—¡Nchroboí!

⁸Kiskoòtsejèn, kijtseè jngoàà kohòyo xi sinè kji. Jè xi tijnakjá-là, Kjoabiyaà 'mì 'ín-là; ìjngoò tjingui-là xi I'nde ts'e Mik'en 'mì. Kitjoé-là kjotíxoma nga ngats'iì xita xi tjin isò'nde, xi ñijòn xita, jngoò kiyá xi kjoa ts'e kjochán, kjoa ts'e kjinchrá, kjoa ts'e ch'in kò kjoa ts'e cho ts'en xi tjin ijiin ijñá sikk'en.

⁹Jè Orrè, k'e nga jaàxìn sello xi ma-ne 'òn, 'an kijtseè ya ingui ímixa tsjeè-là Nainá títajna jñà xita xi kinik'en nga koií kjoa-là 'én-là Nainá, tikoá koií kjoa-là nga kixi kitsjaà 'én-là Nainá. ¹⁰Ñó nchichja nga tsò:

—Na'èn xi jì sabà tìhotìxomai, jì xi ngui tsjeè tijni kò ngui kjokixi, skanda mé nachrjein kíndaàjiin-là nga k'oi-là kjo'in jñà xita xi tjin ján isò'nde, jñà xi kisik'en-najen.

¹¹K'eé kits'iì-là nikje xi chroba kjoàn, ki'mì-là nga kàtasíkjáya chiba nachrjein isa skanda k'e nga kojngoò jñà xi 'ndse joó it'aà ts'e Cristo xi tikoá ngásòn xá-là Nainá kiyájiin-ne.

¹²Jè Orrè, k'e nga jaàxìn sello xi ma-ne joòn, kiskoòtsejèn nga j'iì jngoò ch'ón xi 'ñó ts'a. Jè ts'oií, jmà kji komà koni nikje jmà, kò jè sá, inì kji komà koni jní. ¹³Jñà ni'ño xi tjin ngajmì, chixòt'aà nangui koni ma jñà toò ikò xkoén nga bixòngui k'e nga 'ñó 'ba tjo. ¹⁴Jè ngajmì, k'oaá s'ín kichijà koni jngoò xojon xi ma maxkóya; ngats'iì jñà nindoò kò nangui jiin-nda xi tjin ijiin ndáchikon, jahatjiya-là ya i'nde ñánda títajna. ¹⁵Jñà xitaxá itjòn xi tjin isò'nde, kò xita xi 'ñó ndaà yaxkon-là, kò xita nchiná, kò xita sko-là soldado, kò xita xi tse nga'ño tjin-là, kò xita chi'nda, kò xita xi títajnandeíí nga mìtsà nei tjin-là,

yaá tsibìtsajna'ma ñánda t́jín nguijo kò naxì xi t́jín-la nindoò.

¹⁶Kitsò-la j́ña nindoò kò j́ña naxì:

—Tíkatsjònè-nájen yijo-nò, tíjtsa'ma-nájen mé-ne nga mikiì skoe-najen jè xi t́jnasòn íxile nga tíhotíxoma kò t́koá kitsajna'ma-lajen kjoajti-la kò kjo'in xi tsjá jè Orrè. ¹⁷Nga jye ijchò nachrjein-la Nainá kò Orrè nga kò kjojti-la, 'ñó tse kjo'in tsjá. ¿Yá xi koma kichìkjoako-la?

J́ña chì'nda-la Nainá xi t́jít'aà chìba-la

7 ¹Xi jye komà iskan kjoá koi, 'an kítjseè ñijòn àkjale xi jncha kixì nga ñijòn chrjanguì-la isò'nde xi nchibíchjoàhikon-la tjo mé-ne nga mì tì kii k'oa-ne ya isòn isò'nde kò isòn ndáchikon, t́koá ñjngodó yá sìníyá-la. ²Tíkooá kítjseè ñjngooà àkjale xi t́nchrobá-ne ñánda bitjokàtji-ne ts'oi xi 'ya jngodó kicha ts'e Nainá xi t́jnakon xi ma sit'aà chìba-la xita. 'Nó kiichja-la j́ña àkjale xi ñijòn ma-ne xi jye kitjoé-la nga'ño nga tsjá ch'in-la isò'nde kò ndáchikon. ³Kitsò-la:

—Kì tà chjà ch'in 'bì-lá isò'nde kò ndáchikon kò yá, skanda k'e-né nga jye sit'aà chìba-la ya tjen-la j́ña xi chì'nda-la Nainá.

⁴Ki'nchrè-la kótjín ma-ne j́ña xita xi kisit'aà chìba-la, jngodó sìndo kò ichán ñijòn jmiì ma-ne, ngats'iì tje-la xita Israel. ⁵J́ña ngats'iì tje-la xita koi xi kisit'aà chìba-la: j́ña tje-la Judá, tejà jmiì ma-ne. J́ña tje-la Rubén, tejà jmiì ma-ne. J́ña tje-la Gad, tejà jmiì ma-ne. ⁶J́ña tje-la Aser, tejà jmiì ma-ne. J́ña tje-la Neftalí, tejà jmiì ma-ne. J́ña tje-la Manasés, tejà jmiì ma-ne. ⁷J́ña tje-la Simeón, tejà jmiì ma-ne. J́ña tje-la Leví, tejà jmiì ma-ne. J́ña tje-la Isacar, tejà jmiì ma-ne. ⁸J́ña tje-la Zabulón, tejà jmiì ma-ne. J́ña tje-la José, tejà jmiì ma-ne. J́ña tje-la Benjamín, tejà jmiì ma-ne.

Xita xi ḱjín jchán ma-ne xi chroba kjoàn nikje xi íkjá

⁹Xi jye komà, k'e nga kiskoòtsejèn, ḱjín jchán xita kítjseè; niyá xi maxkeya-la. Yaá títsajna xita xi ya inchrobàjiin-ne ngats'iì nangui xi t́jín isò'nde, kò ngats'iì tje-la xita xi t́jín isò'nde, kò títsajna xita xi chja ngats'iì 'én xi t́jín, kò xita xi ya nchrobá-ne ngats'iì naxandá xi t́jín. J́ña xita koi, 'ncha kixì-né nga nguixkòn xi t́jnasòn íxile nga tíhotíxoma t́koá nga nguixkòn jè Orrè. Saà nikje chrobaá íkjá kò saà xkajén kjiya tsja. ¹⁰Ngats'iì xita koi, 'ñó jchán nchichja nga tsò:

Jè Na'è'n-ná xi Nainá xi t́jnasòn íxile ñánda nga t́hotíxoma
ko jè Orrè,
tsachrjekàjìin-ná kjo'in.

¹¹Ngats'iì jñà àkjale 'ncha kixi-né ya indii-la ñánda t́jna
xi t́jnasòn íxile nga t́hotíxoma ko ya ñánda t́tsajna jñà
xìta jchínga xi kaàn ñijòn ma-ne, ko jñà xi ñijòn ma-ne xi
t́tsajnakon. Chíncha-xkó'nchi-ñiat'aà-la skanda it'aà nangui
nga kijtseèxkón Nainá. ¹²Kitsò:

K'oaá s'ín kátama.

Nainá 'ñó t́jín-la kjoa machikon-t'in, ko kjoa jeya, ko kjoa
chjine,
t́jín-la kjondaà, 'ñó 'nga t́jna, tse nga'ñó t́jín-la,
ko t́jín-la kjotíxoma.

K'oa's'ín kátama skanda nìta mé nàchrjein-ne.

¹³K'eé kiichja jngod-na jñà xìta jchínga, kitsò:

—Jñà xìta xi chroba kjoàn nikje xi íkjá, ¿yá xìta-ne, ñánda
kòf'iì-ne?

¹⁴'An, kixan-la:

—Ngají t́jìin-lè na'èn.

Jè kitsò-na:

—Jñà xìta koi xi tsatojìin kjo'in jè nàchrjein k'e nga 'ñó
tse kjo'in kis'e. Kisitsjeè nikje-la nga ko jní-la Orrè-la Nainá
kisichroba-ne. ¹⁵Koí kjoa-la nga ya t́tsajna-ne nguixkon jè xi
t́jnasòn íxile nga t́hotíxoma ko nàchrjein ko nitjen sís'in-la
ya ingo-la. Jè xi t́jnasòn íxile yaá kíjnajiin osen kjit'aà-la
nga sùkinda. ¹⁶Mì tì kii kjinchrá sùkjeín-ne ko mì tì kii
koxínda-la. Ko mì tì kii kòkà-ne yijo-la jè ndobá-la ts'oi k'e nga
'ñó matsjè. ¹⁷Nga jè Orrè xi t́jna jngod osen-la ñánda t́jna xi
t́jnasòn íxile nga t́hotíxoma, jè sùkinda koni s'ín makinda
orrè; jè kjoiko ñánda t́bitjo nandá xi t́jnakon. Nainá sùxìjno
yije ndáxkon jñà xìta koi.

Xi ma-ne itodò sello

8 ¹Jè Orrè, k'e nga jaàxìn jè sello xi ma-ne itodò, osen-la
hora jñá kis'e ján ngajmì. ²Íkjoàn kijtseè jñà àkjale
xi itodò ma-ne xi 'ncha kixi nguixkon Nainá, jngod chrjo
trompeta kits'iì-la nga jngod ìjngod. ³K'eé j'iì ìjngod àkjale
xi 'ya jngod kichá xi ngui oro jè xi t́jya chrjongó-la Nainá.
Tsasíjna kixi ya it'aà ímixa tsjeè-la Nainá, íkjoàn tse

chrjongó-la Nainá kits'iì-la mé-ne nga ya kisijngoòko-ne jè kjoa bitsi'ba-la jñà xita-la Nainá. Yaá tsaká ya isòn ímíxa tsjeè xi ngui oro xi tǐjna ya nguixkòn jè xi tǐjnasòn íxile ñánda tíhotíxoma. ⁴Jè ni'ndi-la chrjongó-la nainá kò kjoa bitsi'ba-la xita-la Nainá tsijin-né ya tsja jè àkjale ya nguixkòn Nainá. ⁵Jè àkjale kiskoé jè kicha xi tiya chrjongó-la Nainá, chinchá-isa xá'í xi títìsòn ya it'aà ímíxa tsjeè-la Nainá. Ikjoàn kisikatjen-sòn isò'nde; 'ñó kits'iìn ch'on, kina'ya-la jta, ki'ya-la ni'ín ch'on, kò ts'a ch'ón.

Jñà chrjo trompeta

⁶Jñà àkjale xi itoò ma-ne kò itoò chrjo trompeta tjíma'ya tsibítsajnandaà nga siìkjindáya.

⁷Jè àkjale xi síjna ítjòn kisìkjindáya chrjo-la. Ikjoàn ts'a jtsí ndajo kò ni'ín xi tsjájiìn jní; ján kisikasén it'aà nangui. Jè xi ma-ne jàn-ya-la isò'nde, jngoòya kitì; k'oa tí tjín kitì jñà yá; kitì yije xka xkoén.

⁸Jè xi ma-ne jò àkjale kisìkjindáya chrjo-la. Kò jngoò xi okji koni jngoò nindoò xi je kji xi títi, yaá kinìkatjen-jiìn ndáchikon. Nga jàn-ya-la ndáchikon, jngoòya, jní komà. ⁹Jñà cho xi tjín-ngui ndáchikon, jngoòya k'en xi ma-ne jàn-ya cho. K'oaá tís'ín komà jñà chitso, jngoòya chixoña xi ma-ne jàn-ya chitso.

¹⁰Jè xi ma-ne jàn àkjale kisìkjindáya chrjo-la. Jngoò ni'ño xi 'ñó je kji xi títiंगा, kiskaàngui-ne ngajmì. Jè ni'ño jè, jngoòya xajngá nandá kiskaàjiìn xi ma-ne jàn-ya xajngá nandá kò ya ñánda títjo nandá. ¹¹Jè 'ín-la ni'ño jè, xka tsja 'mì. Kò jè nandá, jngoòya kjòtsja, jè xi ma-ne jàn-ya nandá. Kjín jchán xita k'en nga kjòtsja nandá.

¹²Jè xi ma-ne ñijòn àkjale kisìkjindáya chrjo-la. Ikjoàn jngoòya kitsi'on jè ts'oi xi ma-ne jàn-ya yijo-la; kò k'oaá tís'ín komà jè sá kò ni'ño. Ikjoàn kòjñò jngoòya jè ts'oi kò sá kò ni'ño. Koa jngoòya kòjñò jè nàchrjein xi jàn-ya tjín-ne; kò k'oaá tís'ín komà k'e nga nitjen; mì tí kiì kjòhiseèn-ne.

¹³K'e nga kiskoòtsejèn, ki'nchrè jngoò-la ja xi kitoòtjen ján jjiìn isén. 'Ñó kiìchja nga kitsò:

—Ima xó-ne, ima xó-ne, ima xó-ne jñà xita xi tjín ján isò'nde, taxki 'oón komat'in k'e nga skindáya chrjo-la jñà àkjale xi ngui jàn chija-isa.

Chrjo trompeta xi ma-ne 'òn

9 ¹Jè xi ma-ne 'òn àkjale kisikjindáya chrjo-la; 'an kijtsee jngoaa ni'ño xi kiskaàngui-ne ngajmii skanda it'aà nangui. Ikjoàn kjòngatsja jè ibi ts'e nitjan. ²Kiskíx'a jè nitjan. K'oaá s'ín itjo ni'ndi koni tsà ts'e ngajá xi 'ño ìi kjoàn. Jè ni'ndi xi itjo, kisijñò jè ts'oí ko jiiin isén. ³Jè ni'ndi, yaá itjoiin cho langosta xi tsangasòn isò'nde; kits'i-la nga'ño nga ma-la k'oe-e-la xita koni cho na'yá xi tjin isò'nde. ⁴K'oaá s'ín kisatiixoma-la nga mikii tsjá ch'in-la ngats'iìi xka ijña xi tjin isò'nde, ko nijngoò yá; tà jña xi koma tsjá ch'in-la jña xita xi tsjin-la chiba-la Nainá ya itjòn tjen-la. ⁵Mikii kitsjaà'nde-la nga siik'en xita; tà kjo'iin 'òn sá tsjá-la; jè kjo'in xi tsjá, k'oaá ngaya-la koni k'e nga 'bé-la cho na'yá xita nga ijò 'beé. ⁶Nachrjein koi, jña xita mejèn-la nga kiyá, tanga mikii sakò-la kós'ín siik'en yijo-la. 'Nó komejèn-la nga siik'en yijo-la tanga mikii koma kiyá.

⁷Jña cho langosta k'oaá kjoàn isén-la koni kjoàn kohoyo xi binchandaà-la kjojchán. Tjísòn sko koni corona xi ngui oro; isén-la xitaá tjin-la. ⁸Tsja sko k'oaá kjoàn koni kjoàn ts'e íchjín; ni'ño, k'oaá kjoàn koni ts'e xa. ⁹Ya isòn inima-la k'oaá kjoàn xi kijtsa koni kicha tájaà xi síkjeén xita kjojchán; jña jngaá-la k'oaá s'ín na'yà-la nga one koni tsà 'ño kjìn ma carreta xi bíndofe kohoyo nga ongachikon nga fi kjojchán. ¹⁰Tjin nditsin koni cho na'yá ko tjin-la na'yá. Jña nditsin tjin-la nga'ño nga 'òn sá siiki'on xita. ¹¹Jè xi síjna sko-la cho langosta, jè àkjale ts'e nitjan. Jè 'ín-la àkjale jè, xi 'én hebreo, Abadón 'mì, koa xi 'én griego, Apolión 'mì. [Jña 'ín koi, tsòyaá-ne: jè xi síkits'óna.]

¹²Jyeé tsato kjo'in xi tjina ítjòn xi taxki 'oón komàt'in xita; tanga ngui jò chija xi sa nchrobá.

Chrjo trompeta xi ma-ne joòn

¹³Jè xi ma-ne joòn àkjale kisikjindáya chrjo-la; k'eé ki'nchrè jngoò-la jta xi ya itjoiin-ne nga ñijòn nchrajá-la jè ímixa tsjee xi ngui oro jè xi síjna nguixkon Nainá ¹⁴nga kitsò-la jè àkjale xi ma-ne joòn, xi kjiya chrjo tsja:

—Chjijnda'ñoí jña àkjale xi ñijòn ma-ne xi tjít'aà'ño ya chraña-la jè nandá xajngá je Éufrates.

¹⁵ K'eé kitjájnda'nó jñà àkjalé xi ñijòn ma-ne xi jye k'oas'ín títsajnándaà jè hora, jè nachrjein, jè sá kò jè nó, mé-ne nga jngòdya sìik'en-ne xità xi ma-ne jàn-ya ngats'iì xità xi tjín.

¹⁶ An, ki'nchrè-la kótjín ma-ne jñà xità kjoichán xi kohòyo títsajnakjá-la; jò sindo millón ma-ne.

¹⁷ K'oaá s'ín tsatsejèn-na jñà kohòyo kò xità xi títsajnakjá-la nga kichá tájaà kijtsa iníma-la xi inì kjoàn koni ni'ín, xi azul kjoàn koni zafiro, kò xi sinè kjoàn koni azufre. Jñà skò kohòyo, k'oaá kjoàn koni skò xa; kò ya tso'ba, ni'ín bitjo, ni'ndií bitjo, kò azufre bitjo. ¹⁸ Jè kjoa-la nga ingajàn kjo'in koi, jngòd ya k'en xità xi jàn ya ngats'iì xità xi tjín. Jè kisik'en jè ni'ín, ni'ndi kò azufre xi bitjo-ne tso'ba kohòyo. ¹⁹ Nga'nó xi tjín-la kohòyo, yaá tjí'a tso'ba kò itjòn nditsin, nga jñà nditsin k'oaá kjoàn koni kjoàn ye; koa jñà skò síki'on-ne jñà xità.

²⁰ Jñà xità xi tsiningui-ne xi mìkiì k'en k'e nga jye tsato yije kjo'in koi, mìkiì kisikájno jé-la nga mì tì jé kohótsji-ne; takó jñà kijtseèxkón iníma ch'o-la neií, kò jñà isén xi Nainá tsò-la xi kichá oro, plata, bronce, ndajo kò yá, jñà xi mìkiì tsejèn-la kò xi mìkiì 'nchré kò xi mìkiì ma fi. ²¹ Jñà xità koi, mìkiì kisikájno jé-la nga mì tì jé kohótsji-ne nga xità sík'en, nga ma-la bíndaà, kò nga kjoa chijngui s'ín, kò kjoa chijé.

Àkjalé xi kjiya tsja jngòd xojon libro jtabá

10 ¹ Jngòd àkjalé kijtseè-isa xi tjín-la nga'nó xi tínchrobájen-ne ngajmiì nga ifi tsátijno; jè sko kijnasòn jngòd ijñe; isén-la k'oaá kji koni ts'oi; jñà ndsoko k'oaá s'ín tsejèn koni tsà ni'ín xi ncha kixi nga títi. ² Kjinaya tsja jngòd xojon xi jtabá kji xi jye kitjájndaya. Jè ndsoko kixi tsasíjnajiìn ya ndáchikon kò jè ndsoko ngaskón tsasíjnason nangui. ³ K'oaá s'ín 'nó kiichja koni tsò xa k'e nga kjindáya; k'e nga jye kiichja, itodè ch'on kina'ya jta-la nga tikoá kiichja. ⁴ K'e nga jye jane ch'on xi itodè kits'iìn, 'an tijnandaà-ná nga mejèn-na skiijno jngoàà xojon, tanga ki'nchrè jngòd-la jta xi ngajmiì inchrobà-ne xi kitsò-na:

—Jñà 'én xi kàchja ch'on xi itodè kats'iìn, 'maá tikíjni; kì xojoón bìt'iì.

⁵ Jè àkjalé xi 'an kijtseè nga ya síjnajiìn jngòd ndsoko ndáchikon kò xi jngòd ndsoko ya síjnason nangui, kiskímì'nga tsja kixi ján ngajmiì, ⁶ kitsjaà 'én-la it'aà ts'e

Nainá xi tǐjnakon n̄it̄a mé n̄achrjein-ne, jè xi tsibíndaà ngajmì, nangui k̄o ndáchikon, ngats'iì tsojmì xi yà tǐjn, kitsò:

—Mì t̄i k̄i s'e ìsa-ne n̄achrjein. ⁷K'è nga k̄ichóya n̄achrjein-la nga koìts'ia jè àkjale xi ma-ne itoò nga s̄ìkjindáya chrjo-la, jè kjoa'ma-la Nainá k̄itasòn-né koni s'ín kitsò j̄nà x̄it̄a chi'nda-la xi kiichja ngajo-la.

⁸Jè j̄t̄a xi ki'nchrè ít̄jòn-la xi ngajmì inchròbà-ne, ìjngò k'a kiichja-na kitsò:

—T'in, chjoí jè xojon xi jtobá kji xi jye kitjájndaya nga kjinaya tsja jè àkjale xi s̄ijnakixi ìsòn ndáchikon k̄o ìsòn nangui.

⁹Kiikoaan jè àkjale, kixan-la:

—Tjii-ná jè xojon jtobá xi kjinaya ndseji.

Kitsò-na:

—Chjoí, ìkjoàn chinii; ján iya ìndso'boi kotsjaya-né, tanga ya ì'a ndso'boi, ìxiì koma-lè koni tsà tsjén.

¹⁰Kiskoé jè xojon xi kjiya tsja jè àkjale. K'è nga kiskínee, kisihixi'á ndsoba koni tsà tsjén; tanga ján iya ìndso'ba kjòtsja-né. ¹¹Ki'mì-na:

—Mochjeén-né nga ìjngò k'a kinókjoaya ngajo-la Nainá mé kjoa xi komat'in j̄nà x̄it̄a xi k̄jìn naxandá nchròbà-ne k̄o xi k̄jìn nangui chja-ne k̄o xi k̄jìn skoya 'én chja, k̄o mé kjoa xi komat'in x̄itaxá ít̄jòn xi tǐjn ìsò'nde.

Jò ma x̄it̄a xi tsjá 'én ít'aà ts'e Cristo

11 ¹K'èé kits'iì jngò-na yá xi ma machibaya-ne, xi k'oa kji koni kjoàn yá nise. Ki'mì-na:

—Tis̄it̄j̄in, tichibayi jè ìngo ít̄jòn-la Nainá k̄o jè ìmixa tsjeè-la. Tixkeyi kótjín ma-ne j̄nà x̄it̄a xi yà beèxkón Nainá. ²Jè nd̄itsin xi kijnat'aà-la ìngo, k̄i k̄i n̄ichibayi nga j̄nà kitjoé-la xi tax̄ki x̄it̄a xi mìtsà x̄it̄a judío. J̄nà x̄it̄a koi, ichán jò sá kotixoma ya Jerusalén xi ì'nde tsjeè-la Nainá. ³'Aán siikasén ìngajò x̄it̄a-na xi tsjá 'én ít'aà ts'an nga kichjaya jngò jm̄i k̄o jò s̄indò k̄o jàn-kaàn n̄achrjein; k̄o j̄nà nikje xi k̄okjá, nikje jm̄a kjoàn xi ts'e kjoaba.

⁴J̄nà ìngajò x̄it̄a xi tsjá 'én, j̄nà-né ìngajò yá olivo k̄o ìngajò kich̄a candelero xi jncha kixi nguixk̄on Nainá xi otixoma-la ìsò'nde. ⁵Tsà yá xi mejèn-la s̄ìki'on x̄it̄a koi; ni'ín kochrje tso'ba xi jngò k'a k̄okà j̄nà xi kondra-la. K'oaá s'ín kiyá yije,

nita yá-ne xi mejèn-la siki'on. ⁶Jña xita koi tjin-la nga'ño nga ma-la kiichjoà-la ngajmiì mé-ne mì ti kii k'oa-ne jtsi jña nàchrjein k'e nga kichjaya. Tikoaá tjin-la nga'ño it'aà ts'e nandá nga ma-la nga jni s'iin; kò komaá-la kjin skoya kjo'in tsjá-la xita isò'nde; komaá-la nga kos'in s'iin nita kótjin k'a mejèn-la nga s'iin. ⁷Ingajò xita koi, k'e nga jye tsjá 'én-la, jè cho je xi ch'o kji xi bitjomijin-ne ya nitjan jnò, skaàn-ko-né, kò sikijne-la, ikjoàn kiyá ingajò xita koi. ⁸Jña yijo-la xita koi, yaá siyijò osen nditsin-la naxandá ítjòn, nánnda kisit'aà krò Na'èn-ná. Jè 'ín-la naxandá ítjòn xi okji, k'oaá s'in ngaya-la koni Sodoma, o Egipto. ⁹Xita xi ya inchrobàjiiin-ne naxandá xi tjin isò'nde, kò ngats'iì tje-la xita xi tjin isò'nde, kò xita xi chja ngats'iì 'én xi tjin, kò xita xi ya nchrobá-ne ngats'iì nangui xi tjin isò'nde, ján nàchrjein osen skótsejèn-jno yijo-la mik'en; kò mikii tsjá'nde nga siijiiin jña xita koi xi jò ma-ne. ¹⁰Jña xita xi tjin isò'nde kotsjaá-la nga jye k'en xita koi; tsjá kjotjò-la tsojmi xita xikjin. Koi k'oas'in s'iin-ne nga jña ingajò xita xi chja ngajo-la Nainá, tseé kjo'in tsjá-la jña xita isò'nde. ¹¹K'e nga jye tsato xi jàn nàchrjein osen, jè Nainá kisikítsajnakon ijngodò k'a-ne nga jaáya-la; ikjoàn chinha kixi ijngodò k'a-ne; kò ngats'iì xita xi kijtseè, 'ño jchán kitsakjòn. ¹²Ingajò xita koi kii'nchré jngodò-la jta xi 'ño kiichja xi ngajmiì inchrobà-ne, kitsò-la:

—Nchrobá-mijin-jno ijndé.

Ikjoàn kiimijin-jiiin ifi ján ngajmiì. Ngats'iì jña xita kondra-la kijtseè-né. ¹³Tik'eé-ne j'iì jngodò ch'ón xi 'ño jchán ts'a; jngodò ya naxandá chixoña xi ma-ne te ya kóhokji naxandá; kò jè kjoa-la ch'ón, itodò jmiì xita k'en. Jña xita xi tsiningui-ne, ndaà jchán kitsakjòn. Ikjoàn kiichjat'aà-la Nainá xi tjina ngajmiì nga jeya kisikijna.

¹⁴Jyeé tsato kjo'in xi ma-ne jò xi taxki 'oón komàt'in xita; tanga nchrobá nitoón xi ma-ne jàn k'a.

Chrjo trompeta xi ma-ne itodò

¹⁵Jè xi ma-ne itodò àkjale kisikjindáya chrjo-la; kjin jchán jta kina'yà-la ngajmiì xi 'ño kiichja nga kitsò:

Jña kjotixoma xi tjin isò'nde,

jyeé ts'e Na'èn-ná xi otixoma-ná kò jè Cristo xi só kinikasén-ne.

Jè kotìxoma nìtā mé nāchrjein-ne.

¹⁶ Jñā xītā jchínga xi kaàn ñijòn ma-ne, xi títsajnanè íxile nga nguixkõn Nainá, chinchaxkó'nchi-ñiat'aà-lā nga kijtseèxkón Nainá. ¹⁷ Kitsò:

Nā'èñ xi Nainá 'mì-lè.

Ndaà chjí-lè nga ta jì ta jngodè-né xi 'ñó tse nga'ñó tjin-lè, ngaji xi tijni i'ndeí,

kõ xi tijni skanda kjõtseé,

[kõ xi sã kjoíi ijngodè k'a-ne].

Tì'biì-lèjen kjondaà nga jyeé kachjoí nga'ñó xi tjin-lè;

kõ jyeé kòbíts'iì nga jì tilhotìxomai.

¹⁸ Jñā xītā xi taxkì xītā xi mìtsà xītā judío jyeé kòjti-lā; tanga jyeé ijchò nāchrjein-lā kjojti-lè k'e nga jì k'oi-lā kjo'in xītā koi,

jè nāchrjein k'e nga jì kíndaàjìin-lā jñā xītā xi jye k'en kò k'oi-lā kjojtò xi ok'in-lā nga tjoé-lā xītā chí'nda-lè xi kùichjā ngajo-lè

kõ jñā xītā-lā Nainá kò ngats'iì xi beèxkón-lè,

jñā xi jtobá kjoàn kò xītā jchínga.

Síkjhesoìn jñā xītā xi ma-lā síkjehesoìn xītā naxandá isò'nde.

¹⁹ Ján ngajmìi kitáx'a i'nde tsjeè-lā Nainá; yā iya i'nde tsjeè-lā ki'ya-lā jè kaxā ts'e kjoa xi tsibíndaàjìin Nainá kò jñā xītā. Ikjoàn jate ni'ín ch'on, kina'yà-lā jta, kits'iìn ch'on, ts'a ch'ón, ts'a jtsí ndajõ xi 'ñó tsiaàn kjoàn.

Jè chjoón kò jè ye

12 ¹ Ján ngajmìi tsatsejèn jngodè kjoxxkón. Jngodè chjoón ki'ya-lā; jè ts'oi xi ma nikje-lā. Jè sá yaá tìjna ingui ndsoko, kò jngodè corona tjí'a skõ xi tejò ni'ño tjí't'aà. ² Jè chjoón, ki'ndí 'ya. 'Ñó jchán kjindáya nga jye machraña nga jts'ín ki'ndí-lā; tseé kjo'in tísíkjeiín nga jye ijchò chiba-lā nga jts'ín ki'ndí-lā. ³ Ján ngajmìi ijngodè kjoxxkón tsatsejèn. Jngodè ye xi 'ñó je kji tsatsejèn. Inì kji, itodè ma skõ, kò jngodè corona itseé tjí'a nga jngodè ijngodè skõ. Tíkoáá te ma nchrajá-lā. ⁴ Jè nditsin ye, jngodè ya ni'ño tsibíndofe xi ma-ne jàn ya ngats'iì ni'ño xi tjin ngajmìi, ikjoàn tsibítsjot'aà nangui. Jè ye je, tsasjnat'aà-lā jè chjoón xi tí'beé ki'ndí mé-ne nga skine-ne ki'ndí-lā k'e nga jye jts'ín. ⁵ Jè chjoón, tsí'beé jngodè ki'ndí x'in

nga jè kotìxoma-la ngats'iì naxandá xi t́jín isò'nde koni jngòò xita xi yá kicha kjiya tsja nga kiìnè-la kjo'in xita xi mìkii 'nchréñijon-la. Tanga jè ki'ndí-la chjoón, kitjá'an-la; yaá kiìko ñánda t́jna Nainá nga tíhotíxoma. ⁶Jè chjoón, tsanga-né. Ján kii i'nde it'aà xìn ñánda nangui kixì choòn, ñánda nga Nainá tsibíjnandaà jngòò-la i'nde nga ya katjii-la tsojmì xi skine. Jngòò jmiì ko jò sindo ko jàn-kaàn nàchrjein kíjna.

⁷Xi jye komà iskan, ján ngajmiì kis'e kjojchán. Jè àkjale Miguel ko àkjale-la kiskaàn-kjoòko jè ye je. Ko jè ye je, ko àkjale-la nas'ín 'ñó kiskaàn-kjoò, ⁸tanga mìkii kisikijne-la, ko mì tì mé i'nde kis'e-la ján ngajmiì. ⁹K'oaá s'ín komà nga itjokàjiìn ngajmiì jè ye jchínga xi 'mì Xita Neif ko xi 'mì Satanás xi konachan-la ngats'iì xita isò'nde. Kinìkatjengui ya it'aà nangui ko àkjale-la.

¹⁰Ki'nchrè jngòò-la jta ján ngajmiì xi 'ñó kiichja xi tsò:

—I'ndeì jyeé ijchò nàchrjein nga kitjokàjiìn kjo'in xita xinguiáá nga ko nga'ño-la Nainá nga jè kotìxoma ko kjotíxoma xi t́jín-la Cristo [xi Nainá xó kisikasén-ne], koií kjoa-la nga jye kànikatjengui jè xi ko nàchrjein ko nitjen tsját'in 'én ndiso xita xinguiáá nga nguixkon Nainá. ¹¹Jña xita xinguiáá, nga ngui koó nga'ño xi t́jín-la jní xi tsibíxteèn jè Orrè kisikijne-la ko ngui koó jña 'én xi kitsjaà it'aà ts'e Nainá. Mìkii kitsakjòn-la nas'ín kinik'en. ¹²Tsja kàtas'e-la ngajmiì ko jña xi ya títajna. Tanga ima xó-nò jñò xi ya títajnaà it'aà nangui ko xi títajnaà ya ijiiìn ndáchikon nga jè xita neif jyeé ijchòjen-tjingui-nò ko 'ño jti t́jín-la nga jyeé tíjiìn-la nga ta chiba nàchrjein kíjna-isa.

¹³Jè ye xi 'ñó je kji, k'e nga kinìkatjengui it'aà nangui, tsangatjingui-la jè chjoón xi tsi'bee ki'ndí x'in. ¹⁴Tanga jè chjoón, jò jngaá ts'e ja kits'iì-la xi 'ñó iì kjoàn mé-ne koma tótjen-ne nga kongala jè ye xi je kji. Ján kii kíjna ya i'nde it'aà xìn ñánda nangui kixì choòn. Jàn nó osen kíjna nga kokinda nga tjoé-la tsojmì xi skine. ¹⁵Jè ye xi je kji, tsachrje nandá tso'ba nga ndána koma mé-ne nga koma kichrjoako-ne jè chjoón. ¹⁶Tanga jè nangui kisichját'aà-la jè chjoón; kitáx'a, kits'iì ndána xi jè ye tsachrje tso'ba. ¹⁷Jè ye isaá 'ño kjòjtikeè jè chjoón. Kii tjingui kondra-la jña xita tje-la chjoón nga kiikjaán-ko jña xi síkitasòn kjotíxoma-la Nainá ko jña xi ndaà tsjá 'én it'aà ts'e Cristo. ¹⁸Jè ye, yaá tsibijnajiìn tsojmì xi 'ncha indii ndáchikon.

Jò cho ì xi ch'o kjoàn

13 ¹Kijtseè jngoàà cho je xi ch'o kji xi itjo-mijìn-jììn-ne ndáchikon xi itòd ma skò; te ma nchrajá-là; jngoò corona itsé tjí'a nga ìjngoò ìjngoò nchrajá-là; jñà skò tjít'aà 'ín xi Nainá chjajno-là. ²Jè cho je xi ch'o kji xi 'an kijtseè, k'oaá kji koni kjoàn xa indo; k'oaá kjoàn ndsokò koni ts'e cho oso; k'oaá kji tso'ba koni tso'ba xa. Jè nga'ñó xi tjin-là jè ye, kò jè ì'nde-là nánanda tíhotíxoma, kò jè kjotíxoma-là xi 'ñó tjin, jè cho ts'en kjòngatsja. ³'Nó tse kitii jngoò skò jè cho je xi ch'o kji; k'oaá kji komà koni tsà jye kiyá; tanga jè skò xi 'ñó tse kitii, kjòndaà-ne. Ngats'ii xita xi tjin nga tjtsta isò'nde, tà kjòxkón-là kjoa xi komà, kò yaá kiitjingui-là jè cho ts'en. ⁴Ngats'ii xita kijtseèxkón jè ye, nga jè ye kitsjaà-là kjotíxoma xi tískjeén jè cho ts'en. Jñà xita tikoá kijtseèxkón jè cho je xi ch'o kji. Ikjoàn kitsò:

—Tsjin ìjngoò isa koni jè cho je xi ch'o kji; mì yá tjin xi kichikjoa-là nga skaàn-kò.

⁵Jè cho ts'en kitjò'ndeé-là nga kiichja 'én xi 'nga síkijna yijo-là nga chjajno-là Nainá. Tikoá kits'ii'nde-là nga ichán jò sá kotíxoma. ⁶K'oaá s'ín kis'iin; kiichjajno-là Nainá, kiichjajno-là 'ín-là Nainá kò Ni'ya Tsjeè-là, kò kiichjajno-là jñà xita xi títsajna ngajmiì. ⁷Tikoá kitjò'ndeé-là nga kiskaàn-kò xita-là Nainá skanda kó nga kisikijne-là. Ikjoàn kits'ii-là kjotíxoma it'aà ts'e ngats'ii tje-là xita, kò it'aà ts'e ngats'ii naxandá xi tjin, kò it'aà ts'e ngats'ii xita xi chja ngats'ii 'én xi tjin, kò it'aà ts'e xita xi tjin nga ìjngoò ìjngoò nangui xi tjin isò'nde. ⁸Ngats'ii xita xi tjin nga tjtsta isò'nde, jè cho ts'en skoexkón, jñà ngats'ii xita xi mìkii tjít'aà 'ín-là nga tisa tàts'en-là kjoa, jè xojon xi ts'e kjoabinachon xi ts'e Orrè-là Nainá xi k'en ngajo-là xita.

⁹Ndaà tiná'yaà koni xan-nò. ¹⁰Jè xi ndayá kjis'en, k'oaá s'ín tjinè-là nga ndayá kjoì. Jè xi kicha ndojò kiyá-ne, k'oaá s'ín tjinè-là nga kicha ndojò kiyá-ne. Íí mochjeén nga kixi kitsajna kjit'aà kò nga kichikjoako-là kjo'in jñà xita-là Nainá.

¹¹Xi komà iskan kijtseè jngoàà cho je xi ch'o kji xi itjo mijìn-ne ijìn nangui. Jò ma nchrajá-là xi k'oa kjoàn koni nchrajá-là orrè. K'oaá s'ín chja koni jngoò ye xi 'ñó je kji.

¹²K'oaá s'ín tjin-là kjotíxoma koni jè cho je xi ch'o kji xi tjna

ítjòn nga ya sǐjna nguixkòn. Bínè-là xit̃a xi tǐjn isò'nde nga kàteèxkòn jè cho je xi ch'o kji xi tǐjna ítjòn, jè xi kjòndaà-ne ñánda 'ñó tse kitii jngòð skò. ¹³Tikoaá maá-là kis'iin kjoxkòn xi 'in tǐjn. Skanda maá-là kisikjinchrobà-jen ni'ín xi ngajmii nchrobá-ne skanda it'aà nangui nga nguixkòn xit̃a. ¹⁴Kiskòdnachan-là xit̃a xi tǐjn isò'nde, koií kjoa-là jñà kjoxkòn xi kits'i'inde-là nga kis'iin nguixkòn cho je xi ch'o kji xi tǐjna ítjòn. Tsibít'in-là xit̃a nga kátindaà jngòð xkòsòn-là jè cho xi tǐjna ítjòn xi kichà ndojò kitii-ne skò tanga jaáya-là. ¹⁵Jè cho xi ma-ne jò kits'i'ì-là nga'ñó nga kisikǐjnakon jè xkòsòn-là cho xi kisindaà, mé-ne nga koma kichja-ne kò ngats'i'ì xit̃a xi mìkii skoèxkòn sǐik'en-ne. ¹⁶K'oaá s'ín tsibínè-là nga kàtasit'aà chiba-là jñà xi xit̃a ixti, jñà xit̃a jchínga, jñà xit̃a nchiná kò jñà xit̃a ima, jñà xit̃a xi tǐtsajnadejǐ kò xi ch'i'nda tǐtsajna'ñó. Yaá kàtasit'aà chiba-là ya tsja kixi kò tsà ya ítjòn tjen-là. ¹⁷Nijngòð xit̃a xi ma kotse tsojmì, nijngòð xi ma kotǐjna tsà mìkii tǐjt'aà chiba-là kò tsà jè 'ín-là cho mìkii tǐjt'aà-là kò tsà mìkii tǐjt'aà-là número ts'e 'ín-là cho. ¹⁸Ijndé mochjeén kjoachjine-là xit̃a; jè xi ndaà machiya-là, kátixkeya número-là cho je xi ch'o kji; ts'e xit̃a-né. Jè número: jòð sìndò kò jàn kaàn kò jòð.

**Jè Orrè-là Nainá kò jñà xit̃a xi jngòð
sìndò kò ichán ñijòn jmiì ma-ne**

14 ¹Xi komà iskan, kiskoòtsejèn, kijtseè jè Orrè, nga sǐjnaxixi isòn nindoð Siòn kò xit̃a xi jngòð sìndò kò ichán ñijòn jmiì ma-ne xi tǐjt'aà ítjòn tjen-là 'ín-là Orrè kò ts'e Na'èn-là. ²Ki'nchrè jngòð-là jta xi ngajmii nchrobá-ne xi 'ñó tǐhone koni ma nandá k'e nga 'ñó maje, koni ma nga faáya-là ch'on k'e nga jye ts'iin; k'oaá s'ín ki'nchrè-là koni tsà kjin ma xit̃a xi sǐkjane ní'ñó arpa. ³Tína'yà jngòð-là sò xit̃se nga tǐjnda nguixkòn jè xi tǐjnasòn íxile nga tǐhotíxoma, kò ya nguixkòn xi ñijòn ma-ne xi tǐtsajnakon kò ya nguixkòn jñà xit̃a jchínga. Niyá xi ma-là seè jè sò xi tǐjnda, ta jñà-né xi jngòð sìndò kò ichán ñijòn jmiì ma-ne, jñà xi jye itjokàjiiin kjo'in ya isò'nde. ⁴Jñà xit̃a koi, mìtsà íchjín tsibitsajna kò, nguì tsjeè kisijchá yijo-là. Jñà-né xi fǐ tǐjngui-là Orrè nita ñánda-ne nga fǐ. Jñà-né xi itjokàjiiin ítjòn kjo'in ngats'i'ì it'aà ts'e xit̃a xi tǐjn isò'nde, mé-ne nga koma kongatsja ítjòn-ne Nainá kò Orrè. ⁵Nimé 'én ndiso kiichja, kò nimé jé tǐjn-là nga nguixkòn Nainá.

Àkjale xi jàn ma-ne

⁶ Kijtsee ìjngoàà àkjale xi tsó'bajiin isén nga tífiko 'én ndaà-la Nainá xi t́jín nítà mé nachrjein-ne nga keènojímí-la jńá xítà xi títsajna isò'nde, ngats'iì xítà xi t́jín nga ìjngoò ìjngoò nangui, ngats'iì tje-la xítà, ngats'iì xítà xi chja ngats'iì 'én xi t́jín, kò ngats'iì xítà xi t́jín nga ngats'iì naxandá xi t́jín isò'nde. ⁷ Ñó chja kitsò:

—Jchaxkón Nainá, jeya tikíjna; jye ijchò nachrjein-la nga koiindaajiin. Jchaxkón jè xi tsibíndaà ngajmiì, xi tsibíndaà nangui, xi tsibíndaà ndáchikon kò ñánda tíbitjo nandá.

⁸ Ìjngoò àkjale kiichja xi kitsò:

—Jyeé kakaàngui, jyeé kakaàngui Babilonia, naxandá xi 'ńó je kji, jè xi bít'in-la naxandá xi t́jín isò'nde nga [k'jeí' nainá fit'aà-la] koni s'ín xítà k'e nga kjoachijngui s'ín. Koni s'ín kis'iin, k'oaá ngaya-la koni tsà kisich'i yije xítà isò'nde jè xán ts'e kjoachijngui-la xi t́jiko kjoiti-la Nainá.

⁹ Ìjngoò àkjale tsatsejèn xi ma-ne jàn xi 'ńó chja nga kitsò:

—Tsà yá xi skoexkón jè cho je xi ch'o kji kò isén xkòsòn-la, tsà tikoá sit'aà chiba-la itjòn tjen-la, o tsà tsja, ¹⁰ Nainá tsjá-la kjo'in, k'oaá ngaya-la koni tsà vino skoí xi t́jiko kjoajti-la Nainá. Nga jè sobà Nainá jyeé tsibíndaà jngoò chitsín vino xi 'ńó kjaán mé-ne nga kòkò-ne kjoajti-la nga s'e-la kjo'in ijìin ni'ín azufre xi 'ńó tsjè títi. Tíkotsejèn àkjale tsjeè kò Orrè.

¹¹ Jè ñ'ndi-la ts'e kjo'in-la, kjit'aá nachrjein nítà kjé-ne nga kitjomijìn. Mikiì siikjáya kò nachrjein kò nitjen jńá xítà xi jè cho ts'en kò isén xkòsòn-la beèxkón, jńá xi tikoá tít'aà chiba-la kò 'ín-la jè cho je xi ch'o kji. ¹² Íjndé nga mochjeén nga kàtachíkjoa-la nítà mé kjoa-ne jńá xítà-la Nainá xi síkitasòn kjetíxoma-la kò xi ndaà mokjeiín-la it'aà ts'e Jesús.

¹³ Ki'nchrè ìjngoàà 'én xi ngajmiì inchrobà-ne xi kitsò-na:

—Chjí, tít'eii xojon: “Jńá nachrjein xi fi-isa, mé tà ndaà-la jńá xítà xi kiyá nga mokjeiín-la it'aà ts'e Na'èn-ná.” K'oaá tsò Iníma Tsjeè-la Nainá: “Kixí kjoa, jńá xítà koi siikjáya-né kjoa ts'e xá-la; ján ngajmiì, jchaá-la ngats'iì kjoa xi ndaà kis'iin.”

K'e nga maxkó tsojmì xi jye kòjchá ya it'aà nangui

¹⁴ K'e nga kiskoòtsejèn, kijtsee jngoàà ifi xi chroba kji, ya isò'nga ifi tíjna jngoò xi k'oa kji koni ki'ndí-la xítà. Jngoò

corona xi nguì oro tjí'a skò, kò jngòd kichà libá kjiya tsja xi 'nó yijò kji. ¹⁵ Ìjngòd àkjale itjo ya i'nde tsjeè-la Nainá xi 'nó chja, kitsò-la jè xi tíjnasòn ifi:

—Tits'iji nga tixákoji kichà libá-lè; tichásoin, kò tíxkoí kóhotjín tsojmì tjà xi tjin it'aà nangui nga jye kòjchá yije; kò jyeé ijchò nachrjein-la nga sincháxkó.

¹⁶ Jè xi tíjnasòn ifi, tsibíts'iaokò kichà libá-la ya isòn nangui nga tsatesòn tsojmì tjà-la isò'nde, ikjoàn chincháxkó.

¹⁷ Ìjngòd àkjale itjo ya i'nde tsjeè-la Nainá xi kijna ngajmiì xi tikoà kichà libá kjiya tsja xi 'nó yijò kji. ¹⁸ Ìjngòd àkjale itjo-ne it'aà ímixa tsjeè-la Nainá, jè xi síkinda ni'ín. 'Nó kiichja-la jè àkjale xi kichà libá kjiya tsja; kitsò-la:

—Tits'iji nga tixákoji kichà libá-lè xi 'nó yijò kji; tichát'eii 'én-la jnà toò uva xi tjin it'aà nangui, nga jnà toò-la jye kichji.

¹⁹ Jè àkjale tsibíts'iaokò kichà libá-la nga tsatet'aà toò-la jnà yá uva; ikjoàn kisikatsjòya ya nánanda nga ma binchanè toò uva. Kjoa koi, jè okò kjoajti-la Nainá. ²⁰ Mítsà ya jjiin naxandá kisinè jnà toò uva; ján indii naxandá kisinè; k'è nga jye kisinè, jní itjo nánanda nga kisinè; 'nó tse jní itjo skanda ijchò kangui-la kó kji 'nga tíjna freno xi tjí'a tso'ba kohòyo kò jàn sindò kilómetro tsangasòn.

Itoò ma àkjale xi itoò kjo'in j'iiko

15 ¹ Ìjngòd kjojkón kijtseè ján ngajmiì xi 'nó xkón kji kò 'nó jeya ki'ya-la. Itoò ma àkjale xi itoò kjo'in j'iiko jnà kjo'in xi fehet'aà-ne nga yaá fehet'aà-ne kjoajti-la Nainá.

² Tikoà kijtseè jngoà ndáchikon xi chitsín kji; tsjájiin kò ni'ín. Ya ncha kixi isòn ndáchikon xi chitsín kji, jnà xita xi jye kisikijne it'aà ts'è cho je xi ch'o kji kò isén xkósòn-la, jnà xi mikii kitsjá'nde nga kisit'aà chiba-la, kò número ts'è 'ín-la. Xita koi kjiya tsja ní'nó arpa xi Nainá kitsjaà-la. ³ Nchiseè sò-la Moisés xi chi'nda-la Nainá kò sò-la Orrè, nchitsò:

Na'èn xi Nainá 'mì-lè, xi ta ji ta jngòd-né xi 'nó tse nga'nó tjin-lè,

'nó jeya kò 'nó xkón tjin ngats'ii kjoa xi 'nì.

Xita kixi-né; kixii tjin ndiyá-lè.

Jii-né xi Xitaxá Itjòn tijn-la ngats'ii naxandá xi tjin isò'nde.

⁴ ¿Yá xi mikii tsakjón-lè Na'èn?

¿Yá xi mikìi skoexkón-lè?
 Tajngodè ngaji xi xita tsjiì,
 koií k'oas'ín kjoíí-ne ngats'iì naxandá-la isò'nde nga
 skoexkón-lè
 nga jye tí'ya-la kjoa kixi-lè.

⁵K'e nga jye kijtseè kjoa koi, kiskoòtsejèn nga kitáx'a ján ngajmii jè i'nde tsjeè-la Nainá xi tíjnaya iya Ni'ya Nikje xi okó nga ya tíjna Nainá. ⁶Itjo ya i'nde tsjeè-la Nainá jñà àkjale xi itodè ma-ne xi j'iikò itodè kjo'in. Íkjá nikje lino chroba xi 'ñó ote kjoàn; tíkjá ndáyá-la na'ñó payò xi ngui oro. ⁷Jñà xi ñijòn ma-ne xi títsajnakon, jngodè itjojiin xi kisingatsja nga íjngó íjngó àkjale xi itodè ma-ne; kitsjaà íjngó íjngó-la chitsín xi ngui oro xi ya tíjya kjo'in ts'e kjoajti-la Nainá xi tíjnakon nita mé naxrjein-ne. ⁸Ya iya i'nde tsjeè-la Nainá, kitseè ni'ndi xi ya inchrobà-ne it'aà ts'e kjoajeya-la Nainá kò nga'ñó xi tjín-la. Niyá xi kitjò'nde-la nga jahas'en ya i'nde tsjeè-la Nainá skanda k'e nga jye tsitasòn yije jñà kjo'in xi itodè ma-ne xi j'iikò jñà àkjale xi itodè ma-ne.

Chitsín xi itodè ma-ne

16 ¹Ki'nchrè jngoaà 'én xi ya itjo-ne i'nde tsjeè-la Nainá nga kitsò-la jñà àkjale xi itodè ma-ne:

—Tanguió, tíxteèn-sòn isò'nde jñà xi tíjya chitsín xi itodè ma-ne, kjo'in xi tjikò kjoajti-la Nainá.

²Kii jè àkjale xi tsakò ítjòn-la. Tsibíxteèn-sòn isò'nde xi tíjya chitsín-la. Ngats'iì xita xi tjín-la chiba-la cho ts'en kò xi beèxkón jè isén xkòsòn-la jè cho je xi ch'o kji, tsakò-la ch'in xajtsé xi 'ñó ch'o kjoàn kò ijò jchán ma.

³Jè àkjale xi ma-ne jò tsibíxteèn-jiin ndáchikon xi tíjya chitsín-la. Kò jè ndáchikon, ngui jní komà, koni tsà ya k'en-jiin xita. Ngats'iì xi títsajnakon ya ijiin ndáchikon jngodè k'aá k'en.

⁴Jè àkjale xi ma-ne jàn, tsibíxteèn-jiin ya xajngá nandá kò ñánda tíbitjo nandá, jè xi tíjya chitsín-la. Saà jní komà.

⁵Ikjoàn ki'nchrè-la jè àkjale xi ts'e nandá, kitsò:

—Ngaji Na'èn, tjín-lè kjoakixi, nga k'oaá s'ín kits'iì-la kjo'in jñà xita it'aà ts'e kjoa koi, nga jíí xi xita tsjeè 'mì-lè, jíí xi tijni skanda kjòtseé, tijni skanda i'ndeí. ⁶Nga jñà xita koi tsibíxteèn jní-la xita-lè nga jñà kisik'en, kò xita xi kiichja-ngajo-lè. I'ndeí ngaji k'oaá tis'ín tì'bii ngajo-la jní nga nchi'bii; yaá chiba-la.

⁷Ti_{ko}a ki'nchrè jngoð-la 'én xi ya it'aà ímíxa tsjeè-la Nainá chja, nga tsò:

—Ji Na'è'n xi Nainá 'mì-lè, xi ta ji ta jngoð-né xi 'nó tse nga'nó tjín-lè, kixíí kjoa, jñà kjo'in xi tí'biì-la xítà koi, ndaá tjín kò nguì kixíí tjín.

⁸Jè àkjale xi ma-ne ñijòn, tsibíxteèn xi tjíya chítsín-la ya isòn ts'oi. Jè ts'oi kitjò'nde-la nga jè ndobá-la kisichjàn yijo-la xítà.

⁹Jè ndobá-la ts'oi 'nó kisichjàn-la ngats'iì xítà tanga jñà xítà koi mikiì kisikájno jé-la ní mikiì jeya kisikájna Nainá; ta saá kiichjajno-la Nainá nga jè xi tjín-la nga'nó it'aà ts'e kjo'in koi.

¹⁰Jè àkjale xi ma-ne 'òn, tsibíxteèn-sòn jè xi tjíya chítsín-la ya ñánda tíhotíxoma jè cho ts'en. Kò jè i'nde ñánda tíhotíxoma jè cho je xi ch'o kji, kòjñò-né. Jñà xítà xi beèxkón jè cho ts'en kiskinetjòn nijen-la nga 'nó ijò komà-la. ¹¹Tanga mikiì kisikájno jé-la; tà saá isa ndaá kiichjajno-la Nainá xi ts'e ngajmì, koií kjoa-la nga ijò komà yijo-la nga xajtsé tjín-la.

¹²Jè àkjale xi ma-ne joòn tsibíxteèn-jiìn xi tjíya chítsín-la ya xajngá nandá-je Éufrates. Jè nandá-la xajngá, kixiya-né, mé-ne nga koma kjoahato-ne jñà xítaxá ítjòn xi nchrobá-ne ñánda bitjokàtji-ne ts'oi.

¹³Kijtseè-ná nga jè ye xi 'nó je kji, kò jè cho je xi ch'o kji, kò jè xítà xi kiichjaya 'én ndiso nga itjo-ne tso'ba jàn iníma ch'o xi cho xke kjoàn. ¹⁴Jñà-né iníma ch'o-la neíí xi s'ín kjojkón; bitjo nga bíxkóya xítaxá ítjòn xi tjín nga tíjtsa isò'nde nga kjinchrobá kjojchán jè nachrjein xi jye tjíndaà-la Nainá xi ta jè tajngoó xi 'nó tse nga'nó tjín-la. ¹⁵“Tíná'yaà, 'an, k'oaá s'ín kjoiaa koni s'ín f'iì xítà chijé. Mé ta ndaà-la jè xítà xi tíjnandaà k'e nga 'an xi kjoiaa; kjijnandaà nikje-la nga kokjá; mé-ne nga mikiì kosobà-la nga tjína laká.” ¹⁶Jñà iníma cho-la neíí tsibíxkóya xítaxá ítjòn-la isò'nde ya i'nde ñánda 'mì Armagedón xi 'én hebreo.

¹⁷Jè àkjale xi ma-ne itodè, tsibíxteèn ijiìn isén xi tjíya chítsín-la. Kii'nchré-la 'én xi 'nó kiichja xi ya inchrobà-ne i'nde tsjeè-la Nainá xi tjína ngajmì ñánda tjína jè xi tíjnasòn íxile nga tíhotíxoma; kitsò:

—Jyeé tsitasòn yije.

¹⁸Ikjoàn jate ni'ín ch'on, kina'ya-la jta, kits'iìn ch'on, ts'a ch'on xi 'nó jchán ts'a; ní saà jngoð k'a k'oas'ín 'ba kóni nga tisa tsatsejèn xítà isò'nde. ¹⁹Jè naxandá je xi 'nó ndaá

yaxkon-la, jàn ya komà. Kò jñà naxandá xi chja-ne nga ìjngodò ìjngodò nangui xi t́jín isò'nde, jngodò k'aá kichijà. Kò jè naxandá je xi 'mì Babilonia xi 'ñó ndaà yaxkon-la, mìkii kisijchàajiiin Nainá nga kitsjaà-la kjo'in, k'oaá ngaya-la koni kisik'iì jngodò chitsín xi t́jía vino xi nguì kjoajti-la Nainá xi jè jye t́jnandaà-la. ²⁰Ngats'iì nangui xi t́jín jiiin ndáchikon kò jñà nindodò, jngoo k'aá kichijà, mì tì kii ki'ya-la. ²¹Jñà xita tsanè jtsí ndajo xi 'ñó tsiaàn kjoàn, t́jín-la tsà ichán kilo nga jngodò ìjngodò. Jñà xita, 'on kiichjajno-la Nainá, koiì kjoa-la nga tse kjo'in kis'e-la kjoa ts'e jtsí ndajo.

Kós'in s'e-la kjo'in jè chjoón chijngui

17 ¹J'iì jngodò jñà àkjale xi itodò ma-ne xi itodò chitsín t́jía tsja, kiichja, kitsò-na:

—Nchroboí, kokodò-lè kjo'in xi tjoé-la jè chjoón chijngui xi 'ñó ndaà yaxkon-la xi t́jñandiì ñánda nga kjin xajngá nandá fahato. ²Jñà xitaxá ítjòn xi t́jín isò'nde, yaá tsafáhijtakò chjoón jè nga kj'eíi nainá kijtseèxkón k'oaá ngaya-la tsà kjoa chijngui kisikò jè chjoón. Kò ngats'iì xita xi t́jín isò'nde, k'oaá tì kis'iin nga kj'eíi nainá kiitjngui-la k'oaá ngaya-la koni tsà xán ts'e kjoachijngui-la chjoón kjòch'i-ne.

³It'aà ts'e Inimá Tsjeè-la Nainá, jè àkjale kiiko inima-na jngodò i'nde it'aà xìn ñánda nangui kixì choòn. Kijtseè jngoaa chjoón xi t́jñakjá-la cho je xi ch'o kji xi inì kji. Yijàjno yije yijo-la 'én xi kondra ts'e Nainá nga chjajno-la. Itoò ma skò kò te ma nchrajá-la. ⁴Jè chjoón, nikje skò kò nikje inì kjoàn xi íkjá. Yijàjno xi nguì oro kò ndajo ote xi 'ñó ts'e chjí-la, kò ndátòn fangui xi 'ñó chjí-la xi 'mì perla. T́jía tsja jngodò chitsín xi nguì oro; jè chitsín kitseé kjoa ch'o-la kò kjoa tjé xi ts'e kjoa chijngui-la. ⁵Ya ítjòn tjen-la, t́jít'aà 'én 'ma xi tsò: “Babilonia xi 'ñó je kji nga ndaà yaxkon-la, jè nea-la íchjín chijngui kò ngats'iì kjoa ch'o xi t́jín isò'nde.” ⁶K'e nga kiskod'an chjoón jè, kijtseè xkoaàn nga ch'i-né nga jní-la xita-la Nainá kits'iì kò ts'e xita xi kinik'en nga 'én-la Jesús kiichjaya. K'e nga kijtseè tà kjòxkón-na. ⁷Kitsò-na jè àkjale:

—¿Mé-ne maxkón-lè? 'Aán, kènojmi-lè kó tsòya-ne kjoa 'ma-la chjoón jè, kò it'aà ts'e cho je xi ch'o kji xi t́jñakjá-la xi itodò ma skò koa te ma nchrajá-la. ⁸Jè cho xi kà'yi, tsibijnakon-né, tanga i'ndeì t́jñak'en-né; yaá kjinchrobà

mijìn-ne nítjan jñò mé-ne nga jngoò k'a chija-ne. Jñà xítà xi t́jín isò'nde, xi mìkìi t́jít'aà 'ín-la xojon ts'e kjoabinachon kóni nga tísà kisindaà isò'nde, tà koxkón-la k'e nga skoexkon jè cho xi tsibìjnakon, ko 'índeí t́jínak'en-né, tanga kotsején ìjngoò k'a-ne.

⁹Íjndé mochjeén kjohítsjeèn xi t́jín-la kjoa chjine. Jñà sko cho xi itodò ma-ne, jñà ngaya-la jñà nindodò xi itodò ma-ne ñánda t́jnanè jè chjoón. Tíkooá jñà ngaya-la xi itodò ma-ne xítaxá ítjòn. ¹⁰Òn ma-ne xi jye k'en, jngoò ma xi tíhotíxoma-ísa, ko jè xi ìjngoò, kj'eè kiì f'ii. Tanga k'e nga kjoíí, tà chibaá naxrjein kotíxoma. ¹¹Jè cho je xi ch'o kji xi tsibìjnakon tanga 'índeí t́jínak'en-né, jè xi ma-ne jün xítaxá ítjòn. Yaá t́jñajün-la xi itodò ma-ne, ko yaá tífi ñánda nga jngoò k'a chija.

¹²Jñà nchrajá xi te ma-ne xi kà'yi, jñà ngaya-la xítaxá ítjòn xi te ma-ne xi kj'eè kiì tjoé-la kjotíxoma. Tanga k'e nga tjoé-la kjotíxoma ta jngoò hora kotíxomakjoò ko jè cho je xi ch'o kji. ¹³Jñà xítaxá ítjòn xi te ma-ne, tajngoó kjohítsjeèn t́jín-la nga jè cho je xi ch'o kji sùingatsja nga'ño-la ko kjotíxoma-la. ¹⁴Ikjoàn skaàn-ko jè Orrè, tanga jè Orrè sùikijne-né. Nga jè-né xi otíxoma-la jñà xítà xi otíxoma, ko Xítaxá Ítjòn-laá ma jñà xi xítaxá ítjòn títsajna. Jñà xítà xi títsajna, xó kinokjoà-la, xó kitjaàjün-ne, ko kixíí síkitasòn-la.

¹⁵Jè àkjale k'oaá ti kitsò-na:

—Jè nandá xi kà'yi, ñánda t́jñandii chjoón chijngui, naxandá-né, xítà kjín-né, jñá-né xítà xi t́jín nga ìjngoò ìjngoò nangui xi t́jín isò'nde, koa jñá-né xítà xi chja ngats'ii 'én xi t́jín isò'nde. ¹⁶Jñà nchrajá xi te ma-ne xi kà'yi, ko jè cho je xi ch'o kji xi kà'yi, sùjtikeè-né jè chjoón chijngui, kjoaá'an yije-la skanda jñà níkje-la, sùlkájna laká-né. Yijo-la skine-né. Ikjoàn yaá kokájün ni'ín. ¹⁷Nainá k'oaá s'ín tsibíjün kjohítsjeèn-la jñà xítà koi nga k'oas'ín sùikitasòn komi s'ín mejèn-la Nainá. Jè kjotíxoma xi t́jín-la xítà koi t́jngoò ikon nga jè cho ts'en kongatsja, skanda k'e nga kítasòn yije 'én xi kùichja Nainá. ¹⁸Jè chjoón xi kà'yi, jè-né naxandá je xi otíxoma-la jñà xítaxá ítjòn xi t́jín isò'nde.

Kós'ín kiskaàngui jè naxandá Babilonia

18 ¹Xi jye komà iskan, ìjngoò àkjale kijtseè xi t́nchrobájen-ne ngajmii, xi 'ño tse nga'ño t́jín-la. Jè

kjoa jeya-la xi 'nó ote kji, kisihiseèn-sòn nangui. ² 'Ñó kiichja, kitsò:

—Jye kiskaàngui, jye kiskaàngui naxandá je Babilonia. Jyeé ta i'nde-la inima ch'o-la neif komà, ya nánanda kitseè yije inima tjé xi ch'o kjoàn. Kò ya títajna nise xi ch'o kjoàn xi mikiì ma chine. ³ Ngats'iì xita isò'nde, k'oaá ti kis'iìn koni s'ín xita naxandá jè nga kj'eif nainá kiitjingui-la, k'oaá ngaya-la koni tsà kjòch'i-ne jñà kjoachijngui xi kis'iìn. Jñà xitaxá ítjòn-la xi tjín nga títja isò'nde, k'oaá ti kis'iìn. Kò jñà xita isò'nde xi tsojmì otseya nga s'ín kjohima, kjònchiná-né xi kjoa ts'e kjotsja-la yijo-la koni s'ín jñà xita xi tjín naxandá jè.

⁴ Ijngò 'én ki'nchrè xi ngajmiì inchrobà-ne, xi kitsò:

—Jñò xi naxandá ts'an xan-nò, tìtjokàjñò naxandá jè, mé-ne nga mì ya kòkòt'aà-nò jé-la, tìkòkò mìkiì kòkòt'aà-nò kjo'in xi s'e-la. ⁵ Jñà jé-la, jyeé tímakjìn, jyeé j'iì skanda i ngajmiì. Nainá, mìkiì siijchàajiìn [nga tsjá-la kjo'in] xi kjoa ts'e jé-la. ⁶ K'oaá tìs'ín kàtamát'in ngajo-ne koni s'ín kis'iìn jè. Jò k'a k'oa tìs'ín kàtamát'in ngajo-ne koni tjín kjoa xi kis'iìn. Jè chitsín xi kisikáyajiìn vino, kòkji tikájiìn ngajo-la nga jò k'a isa jchá kàtama, [jò k'a okji kjo'in kàtako-la]. ⁷ Jè kjoa-la nga jeya kisikájna yijo-la kò nga 'nó kis'e-la kjotsja, k'oa tìs'ín tjii ngajo-la kjo'in nga kàtakjindáya. Nga k'oaá tsò inima-la: “'An, k'oaá s'ín tìjna nga chjoón skò-la 'mì-na. 'An mìtsà chjoón ka'àn 'mì-na, tìkòkò mìkiì siikjaán kjo'in nita kjé-ne.” ⁸ Koií kjoa-la nga tajngò nachrjein kitjojenè-la kjo'in: Kiyá xita-la. Tìkòkò skindáyane. S'eé-la kjoa ts'e kjinchrá. Ni'ín kitì-ne nga kjoehesòn. Nga 'nó tse nga'nó tjín-la jè Nainá xi otixoma nga k'oaá s'ín jye kiskoòsòn-la nga tsjá-la kjo'in.

⁹ Jñà xitaxá ítjòn-la isò'nde 'nó skindáyakeè kò 'nó 'on kòma-la k'e nga skoe nga tíbitjo ni'ndi-la nga títi jè naxandá jè ya nánanda kiitjingui-la xi kj'eif nainá k'oaá ngaya-la koni tsà jngò chjoón chijngui kiitjingui-la nga kisitsjako yijo-la. ¹⁰ Kjiín kìncha-ne nga skòtsejèn-la, nga tsakjón-la kjo'in-la. 'Ñó kichja, kitso:

—Ima xó-ne, ima xó-ne naxandá je Babilonia xi 'nó kis'e-la nga'nó; tajngò tjà kòf'iì-la kjo'in.

¹¹ Jñà xita xi otijnaya tsojmì xi tjín isò'nde, tìkòkò skindáyakeè-né nga 'on kòma-la inima-la nga mì tì yá xi kòtse-ne tsojmì xi otijnaya, ¹² tsojmì xi ts'e ton oro, plata, ndajo

chjí xi 'ñó ndaà kjoàn, ndátòn chjí xi 'ñó ndaà kjoàn; níkjé lino xi 'ñó chjí, kò níkjé seda, níkjé sko kò xi inì kjoàn; ngats'iì yá xi 'ñó ndaà jne, tsojmì chjí xi nindaà nì'ñò cho kisindaà-ne, ngats'iì tsojmì xi yá xi 'ñó chjí xi yá ikon, kò kichá bronce, kò kichá xi 'mì hierro, kò ndajo marmol, ¹³kò chrjoayá canela, ngats'iì tsojmì xi ndaà jne, chrjongó-la Nainá, kò xkiì jne xi 'mì mirra, kò chrjongó ts'e yá olivo, kò vino kò asiti. Trigo kò skoan inchrajín, kò cho ch'á, orrè, kohòyo, carreta, kò xita chí'nda nga kisatíjna. ¹⁴Kitsò-la jè naxandá:

—Ngats'iì kjoa xi ndaà kisaseèn-la inima-lè, jyeé kitjaàxìn yije-lè. Kjoa nchiná-lè jyeé kichijà. Kò kjoa xi ndaà kòtsjachi, mì ti kiì sakò-lè nita kjé-ne.

¹⁵Jñà xita xi otíjnaya tsojmì xi ya kjònchiná ts'e naxandá jè, kjiín kinchat'aàxìn nga tsakjón-la kjo'in. Skindáyakeè koa 'ñó 'on koma-la inima-la. ¹⁶K'oaá kitsò:

—Ima xó-ne naxandá xi 'ñó je kji, xi níkjé lino chjí tsakakjá kò níkjé xi sko kjoàn kò xi inì kjoàn. Yijàjno yijo-la oro, ndátòn chjí xi 'mì perla kò ndajo chjí xi 'ñó ndaà kjoàn.

¹⁷Tajngòè tjà kachija yije kjoa nchiná xi tjín-la.

Ngats'iì xita xi síxáko chitso, kò ngats'iì xita xi ya chitso títsaya nga nchifì, jñà xi ya iya chitso síxá kò ngats'iì xi síxájiìn ndáchikon, kjiín tsibìtsajna ¹⁸k'e nga kijtseè nì'ndi-la naxandá nga títi; 'ñó kiichja, kitsò:

—Nì saá jngòè naxandá tjín xi mangàsòn-kjoè koni kji naxandá jè, nga 'ñó ndaà kiyaxkon-la.

¹⁹Ikjoàn tsibíxteèn-jno chijo sko, 'ñó kiskindáyakeè nga 'on komà-la inima-la; kitsò:

—Ima xó-ne naxandá xi 'ñó je kji; jè kjoa nchiná-la, ndaà kjònchiná-ne jñà xita xi tjín-la chitso ya jjiìn ndáchikon. Kò i'ndeì, ta jngòè tjà kachija yije kjoa nchiná-la.

²⁰Ngats'iodè jñò xi titsajnaè ngajmiì, tsjaá t'è-là takòn. Jñò xi xita-la Nainá maà, jñò xi tsibíxáya-nò Cristo, kò jñò xi Nainá nokjoà ngajo-là, tsja t'è-là inima-nò. Nainá jyeé kàtsjá-la kjo'in naxandá jè koiì kjoa-la nga ch'o kisìko-nò.

²¹Jngòè àkjalé xi 'ñó tse nga'ñó tjín-la kiskoé jngòè ndajo xi koni kji ndajo natsí kji, kisikatjen-jiìn ndáchikon, kitsò:

—Jè naxandá Babilonia, xi 'ñó je kji, k'oaá s'ín skajiìn-ndá; jngòè k'aá chija nita kjé-ne, mì tì yá xi skoexkon-ne. ²²Mì tì kii kiná'ya-la inchò calle-la jñà música xi síkjane arpa, jñà xi

síkjindáya xobí, kō xi síkjane chrjo trompeta. Mì tì kiì s'e-là xitā xi síxá nità mé xá-ne. Tìkoā mì tì kiì koxáko-ne molino ts'e ncheé. ²³Ni'ín ts'e lámpara, mì tì kiì sīhiseèn-ne; mì tì kiì s'e-ne s'eí nga kixan xitā; koií kjoa-lā kōs'ín komat'in-ne nga jñā xitā-lā xi otseya kō otíjnaya tsojmì, 'nó xitā nchiná komà ì isò'nde; tìkoā kiskoðnachan yije-lā naxandá xi tjín isò'nde nga komà-lā kis'iin kjoatj'e. ²⁴Naxandá jè, Nainá kitsjaà-lā kjo'in nga jé ts'e-né nga kinik'en xitā-lā Nainá kō xitā xi kiìchjaya ngajo-lā Nainá kō ngats'iì xitā xi kinik'en nga tjtisa isò'nde.

Xitā xi tsjá-lā kjondaà Nainá ján ngajmì

19 ¹Xi jye komà iskan, ki'nchrè-lā ján ngajmì 'én koni k'jín jchán ma xitā xi chja nga tsò:

¡Aleluya! ¡Nga tikíjna Nainá!

Nga jè ochrjekàjìin-ná kjo'in kjoa ts'e jé-ná,

kō ta jè tajngoò xi t'jín-lā kjoajeya

kō xi tse nga'nó t'jín-lā.

²Nga jè Nainá, ndaà s'ín kō kixí s'ín

k'e nga tsjá-lā kjo'in xitā;

nga jyeé kitsjaà-lā kjo'in jè naxandá je Babilonia

xi kisikits'ón-jìin isò'nde nga tsakó-lā xitā isò'nde

nga kj'eíj nainá kijtseèxkón

k'oaá ngaya-lā koni jngoò chjoón xi kjoa chingui s'ín.

Koií jé xi komà-lā nga jè kisik'en xitā chi'nda-lā Nainá xi

kiìchja ngajo-lā.

³Íjngoò k'a k'oa kitsò:

—¡Aleluya! ¡Nga tikíjna Nainá! Jè ni'ndi-lā jè naxandá nga títì, k'oaá s'ín kitjomijìn nità mé nachrjein-ne.

⁴Jñā xitā jchínga xi kaàn ñijòn ma-ne kō xi ñijòn ma-ne xi títajnakon, chincha-xkó'nchi-ñiat'aà-lā nga kijtseèxkón Nainá xi tijnasòn íxile ñánda tíhotíxoma. Kitsò:

—¡K'oa'sín kátama! 'Nga tikíjna Nainá. ¡Aleluya!

⁵Ya íxile-lā ñánda tíhotíxoma, kina'yà-lā 'én xi kitsò:

Tjìl-lā kjondaà Nainá ngats'ioò jñò xi chi'nda maà,

jñò xi íxti maà kō xitā jchínga,

ngats'ioò xi tsakjoòn-chaà Nainá.

⁶Ki'nchrè-lā 'én koni tsà k'jín jchán ma xitā xi chja, koni s'ín na'yà-lā nandá k'e nga one, koni s'ín na'yà-lā k'e nga one ch'on, xi kitsò:

¡Aleluya!

¡Nga t̄ikíjna Nainá xi ta jè tajngoó xi 'ñó tse nga'ño t̄jín-la!
Nga jyeé jè tíhotíxoma.

⁷Tsja k'oé-lá in̄ima-ná, sìtsja-chaá takoán, jeya s̄ikíjnaá

Nainá,
nga jyeé j'i kjoa bixan-la Orrè;
chjoón-la jyeé t̄jñandaà.

⁸Jè chjoón, jye ko'biì-la nikje lino xi 'ño chjì,
xi 'ño tsjeè kjoàn t̄ikoá 'ño ote nga kónakjá.

Jè nikje lino xi 'ño chjì, jè ngaya-la kjoakixi xi s'ín x̄ita-la
Nainá.

⁹Jè àkjale kitsò-na:

—Chjì kjoa koi: “Mé ta ndaà-la j̄nà x̄ita xi xó kinokjoà-la kjoa
bixan-la Orrè nga jè k̄okjen-ko.”

Kitsò ìsa:

—J̄nà 'én koi, ngui 'én kixi-la Nainá-né.

¹⁰Tsohósijna xkó'nchiñia it'aà ndsoko jè àkjale nga mejèn-na
skoexkoán. Tanga jè àkjale kitsò-na:

—Kì k'oaa 'nì; 'an, t̄ikoaa chi'nda-la Nainá ma koni ngaji ko
j̄nà 'ndsì xi ndaà fì t̄jngui-la j̄nà 'én kixi xi k̄iichja Jesús. Jè
Nainá chaxkoín.

J̄nà 'én kixi xi k̄iichja Jesús, t̄jñà-ne xi s̄kítsjeèn-ya-la x̄ita
xi chja ngajo-la Nainá.

Jè xi t̄jnasòn-la kohòyo chroba

¹¹Kijtseè ngajmì nga t̄ix'á; tsatsejèn jngoò kohòyo xi chroba
kji. Jè x̄ita xi t̄jnakjá-la, k'oaa s'ín yaxkon-la nga kixi síkitasòn
ko kixi t̄jna, koií kjoa-la nga ngui ko kjoakixi-la bíndaajìin
ko nga kjaán-kjoò. ¹²J̄nà xkon, k'oaa kjoàn koni ni'ín. Ya sko,
kjín corona jtobá t̄j'a ko jngoò 'ín-la t̄jít'aà xi mìkii yá xi
machiya-la kó tsòya-ne; tajngoò jè machiya-la kó tsòya-ne.

¹³Jè nikje xi kinakjá, jnì yijàjno. Jè 'ín-la, 'Én-la Nainá 'mì.

¹⁴Yaá t̄jngui-la j̄nà soldado ts'e ngajmì nga t̄itsajnakjá-la
kohòyo chroba; saà nikje lino chrobaá íkjá xi 'ño chjì ko tsjeè
kjoàn. ¹⁵Jè tso'ba bitjo jngoò k̄icha ndojò xi 'ño yijò kji, jè xi
síki'on-ne ngats'ì naxandá. Nga jè kotixoma-la x̄ita naxandá.
Jè yá nise s̄ikjeén xi ngui k̄icha tájaà. Jè sobá kosinè j̄nà toò
uva ya iya chitso nga kochrje vino xi okó kjoajti-la Nainá xi ta
jè tajngoó xi 'ño tse nga'ño t̄jín-la. ¹⁶Jè nikje-la ko chrjomí-la

tjít'aà 'ín xi tsò: “Xitaxá Ítjòn-la ngats'iì jñà xi xitaxá ítjòn títsajna kò jè-né xi otíxoma-la ngats'iì jñà xita xi otíxoma.”

¹⁷Kijtseè jngoaa àkjale xi ya síjnasòn-la ts'oi; 'nó chja-la ngats'iì cho xi tjímajìin isén xi yijo kine. Tsò:

—Nchrobá, tixkóyaa xinguio mé-ne nga chjinee yijo xi Nainá tsjá-nò, ¹⁸nga chjinee yijo-la xitaxá ítjòn, kò yijo-la xita sko-la soldado, yijo-la xita ts'en, yijo-la kohoyo kò yijo-la xita xi titsakjá-la kohoyo, yijo-la ngats'iì xita xi títsajnandeí kò xita chí'nda kò xi íxti kò xita jhínga.

¹⁹Kijtseè jè cho je xi ch'o kji kò jñà xitaxá ítjòn ts'e isò'nde kò xita soldado-la; jyeé títsajnandaà nga skaàn-kò jè xi tíjnakjá-la kohoyo chroba kò jñà soldado-la. ²⁰Jè cho je xi ch'o kji kindobà'nó; tikoà kindobà'nó jè xi 'én ndiso kiichja xi kis'iin kjojkón nga nguixkón jè cho. K'oaá s'ín komà-ne nga kiskoðnachan-la jñà xita xi kiskoé chiba-la tikoà kijtseèxkón isén xkósòn-la jè cho. Ingajò kinikatsjodjìin tíkòn ijìin ni'ín xi títìjnga ñánda títi kò azufre. ²¹Jñà xita xi i'nga, jè kisik'en-ne jè kichá ndojò xi bitjo tso'ba jè xi tíjnakjá-la kohoyo. Ngats'iì cho xi tjímajìin isén, jñà kjòskii-ne nga kiskine yijo-la xita xi jye k'en.

Jè xi jngod jmiì nó

20 ¹Kijtseè jngoaa àkjale xi tínchrobájen-ne ngajmiì. 'Ya ibi ts'e nitjan jñò. Kjiya tsja jngod na'nó kichá cadena xi 'nó je kji. ²Jè àkjale kitsobà'nó jè ye jhínga xi tijè-ne xi 'mì Xita Neí kò xi Satanás. Jngod jmiì nó tsibít'aà'nó. ³Kisikatjen-s'en ya nitjan jñò; tsibíchjoà'nó-la jè xotjoa; ikjoàn tsasíjna-la sello mé-ne nga mì yá skíx'a-ne jè xotjoa nitjan. Yaá tsasíjnahiya mé-ne nga mì tì kii koma skónachan-la xita isò'nde, skanda k'e nga kjoehet'aà xi jngod jmiì nó. Xi koma iskan tjájnà'nó ijngod k'a-ne nga koma kojmeèndeí chiba nachrjein isa.

⁴Kijtseè íxile ts'e kjotíxoma; títsajnasòn jñà xita xi kitjoé-la kjotíxoma nga jñà koìndaàjìin. Tikoà kijtseè iníma-la jñà xita xi kitiís'iin, nga koi kjoa-la 'én kixi xi kitsjaà ít'aà ts'e Jesús kò nga 'én-la Nainá kiichjaya. Jñà xita koi, mìkii kijtseèxkón jè cho je xi ch'o kji kò isén xkósòn-la; tikoà mìkii kisit'aà chiba-la ítjòn tjen-la kò tsja. Xita koi, ijngod k'a tsibítsajnakon; jngod jmiì nó tsatíxoma kò Cristo. ⁵Jñà xita koi xi jaáya

ítjòn-là. Tanga jñà mik'en xi i'nga, skanda k'eé jaáya-là nga ijchò jngodò jmiì nó. ⁶Mé ta ndaà-là jñà xi kòkò-là nga kjoaáya ítjòn-là; xítà koi, jyeé xítà-là Nainá koma; jè kjoa biyaà xi ma-ne jò, nímé nga'ño tjin-là it'aà ts'e xítà koi; mì tì mé ma sùiko-ne. Tà saá no'miù-là Nainá koma kò ts'e Cristo. Jngodò jmiì nó kotìxomako.

⁷K'e nga kjoehet'aà xi jngodò jmiì nó, tjàjnda'ño ijngodò k'a-ne jè Satanás ya nánada tijnahiya nitjan jñò. ⁸Kitjondeií-ne nga skónachan-là xítà naxandá xi tjin nga tjtisa isò'nde, jè Gog kò Magog. Koiìxkóya xítà mé-ne nga koiìts'ia-ne kjojchán. Kjin jchán koma xítà, k'oaá ngaya-là koni tsomì xi jncha indii ndáchikon. ⁹Chinchimasòn kóhokji isò'nde; chinchandii-là nga jngodò itjandii nánada títsajna xítà-là Nainá kò naxandá xi tsjakeè. Ikjoàn kisìkasén ni'ín Nainá xi inchrobà-ne ngajmiì. Jngodò k'a tsaká kóhotjin. ¹⁰Jè xítà neií xi kiskoònachan-là xítà, kinikatjen-jiin ya i'nde nánada títinga ni'ín kò azufre. Jyeé ya títsajna jè cho je xi ch'o kji kò xi kiichjaya 'én ndiso. Yaá sùikjeiín kjo'in kò nachrjein kò nitjen nita kjé-ne.

Jè íxile ts'e kjotíxoma xi chroba kji

¹¹Kijtseè jngodò íxile xi chroba kji kò 'ño je kji nga ya tijnasòn jngodò xi tíhotíxoma. Nga nguixkòn jè xi tijnasòn íxile, jngodò k'a kichijà nangui kò ngajmiì. Nita nánada-ne, mì tì kii ki'ya-là. ¹²Kijtseè mik'en xi ixti kjoàn kò xi xítà jchínga kjoàn, 'ncha kixi nguixkòn Nainá. Ikjoàn kitáx'a jñà libro [nánada tjt'aà mé xi kis'iìn nga jngó jngó xítà]; koa ijngodò libro kitáx'a nánada tjt'aà ts'e kjoabinachon. Jñà mik'en, k'oaá s'ín kisindaàjiin-là koni s'ín tjt'aà xojon ts'e libro, mé kjoa xi kis'iìn. ¹³Jè ndáchikon kitsjaà jñà mik'en xi ya k'en-jiin. Jè kjoabiyaà kò i'nde kjo'in tikoáá kitsjaà mik'en xi ya títsajna. K'oaá s'ín kisindaàjiin-là nga jngodò ijngodò xítà koni tjin kjoa xi kis'iìn. ¹⁴⁻¹⁵Jè kjoabiyaà kò i'nde kjo'in kinikatsjodjiin nánada títi ni'ín jnga. Kò jñà mik'en xi mikii tjt'aà 'ín-là jè libro ts'e kjoabinachon, tikoáá yaá kinikatsjodjiin nánada títi ni'ín jnga. Jè xi ma-ne jò kjoabiyaà.

Ngajmiù xítse kò nangui xítse

21 ¹Kijtseè jngoáá ngajmiù xítse kò nangui xítse. Jè ngajmiù xi kisijna ítjòn kò nangui xi kisijna ítjòn, jyeé

kichijà; tìkoáá kichijà jè ndáchikon. ²Tìkoá kìjtseè jè naxandá tsjeè xi Jerusalén xitse 'mì, nga tínchrobájen ngajmiì nga nguixkõn Nainá. K'oaá s'ín tijnandaà koni jngodõ chjoón xi ndaà bíndaà yijo-la nga jye kixan-kõ x'in-la. ³Ki'nchrè-la 'én xi 'nó chja, xi ngajmiì inchrobà-ne, xi tsò:

—Chítsejèn-là Ni'ya Tsjeè-la Nainá, jyeé kòbitjojen; Nainá yaá kijnako jñà xitá; xitá naxandá-laá koma, nga jè sobà xi Nainá kítóso-la. ⁴Jè sobà Nainá siixijno yije ndáxkõn; mì tì kii s'e-ne kjoabiyaà; mì tì kii s'e-ne kjoaba; mì tì kii yá skindàya-ne; mì tì kii s'e-ne xi ijòjno ijò't'aa yijo-la, koi kjoa-la nga jye tsato kjoa jchínga.

⁵Jè xi tijnasòn íxile ts'e kjo'tíxoma, kitsò:

—Chítsejèn-la, 'aán siixitseyá yije tsojmì xi tjin.

Ikjoàn kitsò-na:

—Chjí, xojon tít'eii jñà 'én koi; nga nguì k'oaá s'ín tjin nga kítasòn; nguì 'én kixi-né.

⁶Ikjoàn kitsò-na:

—Jyeé tsitasòn yije. 'An-ná xi tijná ítjoàn skanda tàts'en-la kjoa kó nga skanda fehet'aà-ne. 'An-ná xi tsibìts'iaa kò xi sikjehet'aà-na kjoa. Ngats'iì xi xindá-la, 'aán tsjaá kjo'tjò-la nandá xi títbitjo ya 'inde nánnda mìkii xiya nandá mé-ne koma kijnakon-ne inima-la nita kjé-ne. ⁷Jñà xi siikijne, jñà skoé kjo'tjò ngats'iì kjondaà koi. 'Aán kótijnakoaa nga Nainá kítóso-na kò jñà, ixti-naá koma. ⁸Tanga jñà xitá xi tsakjón, jñà xi mìkii mokjeiín-la, jñà xi 'nó ch'o s'ín, jñà xi xitá sík'en, jñà xi kjoa chijngui s'ín, jñà xi xitá tje, jñà xi xkósòn beèxkón, ngats'iì xi 'én ndiso chja, ján kixojiiñ nánnda títi ni'ín jnga kò azufre; jè xi ma-ne jò kjoabiyaà.

Naxandá xitse xi 'mì Jerusalén

⁹J'iikon jngodõ-na àkjale jñà xi itodõ ma-ne, xi tìkoá itodõ chitsín tjin-la, xi jncha kitseè xi itodõ kjo'in xi fehet'aà-ne. Kitsò-na:

—Nchroboí, kokoð-lè jè xi koma chjoón-la Orrè.

¹⁰It'aa ts'e Inima Tsjeè-la Nainá, jè àkjale kiikõ inima-na jngodõ nindodõ xi je kji kò 'nga kji. Tsakó-na jè naxandá xi je kji, naxandá tsjeè Jerusalén nga tínchrobájen-ne ngajmiì nga nguixkõn Nainá. ¹¹Jè naxandá tsjeè Jerusalén, oteé tsejèn xi kjoa ts'e kjoajeya-la Nainá. K'oaá s'ín ote kji koni ndajo chjí

xi 'nó ndaà kjoàn, koni ndajo xi jaspe 'mì nga ote kji koni chitsín. ¹²Nga jngoò itjandiì, jè naxandá, chrjó ndajo tjíndiì-la xi 'nó je kji kò 'nó 'nga kji. Tejò xotjoa tjín-la. Nga jngoò ìjngoò xotjoa, jngoò àkjale sijnajto. Tikoa ya tít'aà 'ín-la nga tejò naxandá xi ya inchrobàt'aà-ne ìxti-la Israel. ¹³Ya kixi-la ñánda bitjokàjiin-ne ts'oi, jàn xotjoa tjín-la, ya kixi-la ñánda kahatji-ne ts'oi, jàn xotjoa tjín-la. Ya norte, tikoaá jàn xotjoa tjín-la, ya sur, tikoaá jàn xotjoa tjín-la. ¹⁴Jè chrjó ndajo xi tjíndiì-la naxandá, tejò chrjó ndajo xi ya tít'aà nga tejò 'ín-la xita xi tejò ma-ne xi it'aà ts'e Orrè kisixáya-la.

¹⁵Jè àkjale xi tíchjako-na, jngoò kicha kjinaya tsja xi ngui oro xi koni kji yá xi ma machiba-ne. Jè kisikjeén nga ma kisichiba naxandá kò xotjoa-la kò chrjó ndajo-la. ¹⁶Jè naxandá k'oaá s'ín kijna nga ñijòn chrjangui tjín-la. Koni kji ndojò, k'oaá tì kji tiyà-ne. Jè àkjale, k'e nga kisichiba, jò jmiì kò jò sìndo kilómetro tjín-la. Ngásòn chiba tjín-la nga ndojò kò nga tiyà kò nga 'nga. ¹⁷Ikjoàn kisichiba jè chrjó ndajo. Jngoò sìndo kò ichán ñijòn xkó tsja tjín-la xi chiba-la xita xi tísikjeén jè àkjale, [jè xi ichán nanga tjín-ne].

¹⁸Jè chrjó ndajo xi tjíndiì-la naxandá, koifí tjíndaà-ne ndajo chjí xi 'mì jaspe. Kò jè naxandá, ngui oro sobà-né. K'oaá s'ín ote kji koni chitsín tsjeè. ¹⁹Jñà tàts'en chrjó xi tjíndaà-ne nga tíchjoàndiì-la naxandá, ngui ndajo chjí yijàjno xi 'nó ndaà kjoàn. Jè xi ítjòn, jè ndajo xi 'mì jaspe; xi ma-ne jò, ndajo xi 'mì zafiro; xi ma-ne jàn, ndajo xi 'mì ágata; xi ma-ne ñijòn, ndajo xi 'mì esmeralda; ²⁰xi ma-ne 'òn, ndajo xi 'mì ónice; xi ma-ne joòn, ndajo xi 'mì cornalina; xi ma-ne itoò, ndajo xi 'mì crisólito; xi ma-ne jiin, ndajo xi 'mì berilo; xi ma-ne ñijaàn, ndajo xi 'mì topacio; xi ma-ne te, ndajo xi 'mì crisoprasa; xi ma-ne tejngoò, ndajo xi 'mì jacinto; xi ma-ne tejò, ndajo xi 'mì amatista. ²¹Jñà xotjoa xi tejò ma-ne, tejò ndajo perla tjíndaà-ne. Nga jngoò ìjngoò xotjoa jngoò perla tjíndaà-ne. Ndiyá teè-la naxandá, ngui oro sobà-né koni chitsín xi ma chítsejèn-ya.

²²Ya ijiin naxandá, nijngoò ingo kijtseè; nga jè sobà xi ma ingo-la naxandá, jè Nainá xi títja ítjòn nga ta jè tajngoò-né xi 'nó tse nga'nó tjín-la kò jè Orrè. ²³Jè naxandá, mìkii mochjeén-la jè ts'oi kò sá nga sìhiseèn-la. Nga jè sobà kjoa isén-la Nainá síhiseèn-la; kò jè Orrè ma ni'ín-la. ²⁴Ngats'iì jñà

xit̄a naxandá ts'e isò'nde kinchima iseèn-né it'aà ts'e ni'ín-la. Ko j̄nà xitaxá ítjòn xi t̄jín isò'nde, k̄jiko kjoanchiná-la nga ya s̄ìngatsja. ²⁵J̄nà xotjoa-la naxandá, mikii s̄ichjoajto nga k̄jit'aà n̄achrjein; nga ya naxandá, mikii kojñò. ²⁶Ngats'iì naxandá kjoikò ngats'iì kjoa nchiná-la kò ngats'iì tsojmì xi 'n̄ó ch̄jì-la nga ya s̄ìngatsja. ²⁷Ya i'nde jè nimé kjoahas'en xi t̄jé kjoàn xi ch'o s'ín kò xi kjoa ndiso. Tà j̄nà kjoahas'en xi t̄jít'aà 'ín-la jè xojon-la Orrè xi ts'e kjoabinachon.

22 ¹Jè àkjale tsakó jngoò-na xajngá nandá xi kijna tsjeè tsjeè, jè nandá xi bítsajnakon-ná nit̄a mé n̄achrjein-ne. K'oas'ín tsjeè k̄ji koni ch̄ítsín. Yaá t̄íbitjo n̄ánda s̄ijna íxile-la Nainá nga t̄íhotíxoma kò yaá t̄íbitjo n̄ánda t̄ijna jè Orrè. ²Ya jngoò osen ndiyá-la naxandá t̄ífa nandá. Kò ya ngobà ngobà xajngá nandá, yaá s̄ijna jè yá xi tsj̄a kjoabinachon nit̄a mé n̄achrjein-ne. Tejò k'a ojà-la toò nga jngoò nó. Jngoò jngoò k'a ojà-la toò nga ìjngoò ìjngoò sá. J̄nà xka-la, k'oaa s'ín mochjeén nga maxkiì-la naxandá ts'e isò'nde. ³Mì t̄i mé kjoa ch'o s'e-ne xi mikii sasén-la Nainá. Yaá sas̄ijna jè íxile-la Nainá kò ts'e Orrè nga kot̄ixoma. Kò ngats'iì xit̄a ch̄i'nda-la, yaá s̄ìxá-la. ⁴Ngats'iì xi xit̄a-la ma, skoexkon-né kó k̄ji isén-la Nainá; kò jè 'ín-la Nainá yaá s̄it'aà ítjòn t̄jen-la. ⁵Ya i'nde jè, mì ti kojñò-ne. J̄nà xit̄a xi ya t̄ítsajna, mì t̄i ni'ín kochjeén-la xi s̄ìhiseèn-la, t̄ikoaá mì t̄i ts'óí kochjeén-la; nga jè sobá Na'èn-ná xi Nainá s̄ìhiseèn-la. J̄nà xit̄a kot̄ixoma nit̄a mé n̄achrjein-ne.

Jyeé nchrobá machrañà nga kjoíì ìjngoò k'a Cristo

⁶Jè àkjale kitsò-na:

—'Én koi, nguì k'oaa s'ín t̄jín nga kit̄asòn; nguì 'én kixi-né. Jè Na'èn-ná xi Nainá xi s̄íkíchiya-la j̄nà xit̄a xi ch̄ja ngajo-la, koií xá kisikasén-ne àkjale-la nga kòkò-la xi ch̄i'nda-la ma j̄nà kjoa xi ta nit̄oón okoma.

⁷—T̄iná'ya-ná. 'An, kjoíì nit̄oón ìjngoò k'a.

Mé tà ndaà-la j̄nà xi s̄íkitasòn j̄nà 'én xi kitsjaà Nainá koni s'ín t̄íchja xojon jè.

⁸'An-ná xi 'mì-na Juan, 'aán ki'nchrè koa k̄ijtseè kjoa koi. K'e nga jye ki'nchrè koa jye k̄ijtseè, tsohósijna-xkó'nchiniñiat'aà-la jè àkjale xi t̄íhokó-na kjoa koi, nga mejèn-na skoexkoán. ⁹Tanga jè àkjale kitsò-na:

—Kì k'oaá 'nì. Jè Nainá jchaxkoín. 'An, tìkooá chí'nda-la Nainá ma, koni ngaji, kò xitá xingui xi chja ngajo-la Nainá, kò ngats'iì xitá xi síkitasòn 'én xi tjit'aà xojoñ jè.

¹⁰K'oaá tìs'ín kitsò-na:

—Kì bijna'ma jñà 'én xi Nainá kitsjaà xi tjit'aà xojoñ jè, nga jyeé nchrobá machrañà nachrjein nga kitasòn. ¹¹Jñà xitá xi mitsà kixi títajna nguixkòn Nainá nga ch'o s'ín, ta k'oaá s'ín kàtitsajna. Kò jñà xi tjin-la kjoakixi kò tsjeè títajna nga nguixkòn Nainá, k'oaá tìs'ín kàtasíkitasòn xi kjoakixi kò kjoatsjeè.

¹²—Tiná'ya, 'an, kjoíi nitoón ìjngod k'a. Yaá kjoikoaa chí-la xi tsjaà-la xitá koni s'ín kis'iìn nga ìjngod ìjngod. ¹³'An-ná xi tijná ítjoàn skanda tàts'en-la kjoa kò skanda fehet'aà-ne. 'An-ná xi tsibìts'iaa kò xi sikjehet'aà-na kjoa. 'An-ná xi tijná ítjoàn kò xi fehet'aà-ne.

¹⁴Mé ta ndaà-la jñà xitá xi [jní-la Orrè] sítsjeè-ne nikje-la mé-ne nga tjò'nde-la nga skine toò-la yá xi tsjá kjoabinachon, tìkooa koma kjoahas'en xotjoa-la jè naxandá. ¹⁵Tanga nditsiaán kítajna, ngats'iì jñà xitá xi ch'o s'ín, kò jñà xi xitá tje, kò jñà xi kjoa chíjngui s'ín, kò jñà xi xitá sík'en, kò jñà xi xkòsòn beèxkòn kò ngats'iì xi tsjakeè kjoa ndiso nga 'én ndiso chja.

¹⁶—'An xi 'mì-na Jesús, 'aán kisikasén-nò àkjale-na nga tsjá-nò 'én ít'aà ts'e kjoa koi, jñò xi xitá naxandá-na ma. 'An-ná jè jts'én xi ítjot'aà-ne tje-la xitaxá ítjòn xi ki'mì David. 'An-ná ni'ño tse xi 'ño ote kji xi bitjokàtji k'e nga tajñòya.

¹⁷Jè Inima Tsjeè-la Nainá kò chjoón-la Orrè, tsò-né:

—Nchroboí [Nà'èn Jesús].

Jñà xi nchi'nchré, k'oaá tì kàtatsò:

—Nchroboí [Nà'èn Jesús].

Jñà xi xínda-la kò xi mejèn-la nandá, kàtjanchrobá, kàt'iì kjotjò nandá xi tsjá kjoabinachon.

¹⁸'An, k'oaá xan-nò, ngats'ioò xi na'yà-là jñà 'én xi kitsjaà Nainá xi tjit'aà xojoñ jè: Tsà yá xi kjiit'aàsòn kjoa xi tjit'aà xojoñ jè, Nainá k'oaá tìs'ín tsjásòn-la kjo'in koni s'ín tjit'aà xojoñ jè. ¹⁹Tsà yá xi kjoaáxìn jngod-la 'én xi kitsjaà Nainá xi tjit'aà xojoñ jè, Nainá, tìkooá kjoaáxìn kjondaà xi tji'nde-la nga skine toò-la yá xi tsjá kjoabinachon kò mìkii tsjá'nde-la nga ya kítajna naxandá tsjeè-la Nainá koni s'ín tjit'aà xojoñ jè.

²⁰Jè xi bénojímí kjoa koi, k'oaá tsò:

—Jon, kjoii nitoón ìjngoò k'a.

K'oaá s'ín kàtama. ¡Nchroboí Nà'èn Jesús!

²¹Kjondaà-là Nà'èn-ná Jesucristo kàtìjnako-nó ngats'ioò.
K'oaá s'ín kàtama.